

**EKALESIA FAAPOTOPOTOGA KERISIANO SAMOA**

**CONGREGATIONAL CHRISTIAN CHURCH SAMOA**

**TUSI MO FAIA'OGA O AOGA ASO SA**

**SUNDAY SCHOOL TEACHERS' TEXTBOOK**

**2 0 2 4**



**VASEGA AMATA**

**ELEMENTARY CLASS**

**(3 – 7 tausaga)**

**MATAGALUEGA O A'OA'OGA KERISIANO**

**DEPARTMENT OF CHRISTIAN EDUCATION**

## **UPU TOMUA**

E mua'i faatalofa ma faafeiloai atu i le paia tele o le Eklesia Faapotopotoga Kerisiano Samoa i ona tulaga faalupeina, i le Suafa pele o Iesu Keriso lo tatou Taitai Sili. Ua faamalo le soifua manuia ia outou susuga i Toeaina, susuga i Faafeagaiga, Faifeau, A'oa'o ma Faletua, tainane foi afioga i Tiakono, susuga i alii ma tamaitai Faiaoga o tatou Aoga Aso Sa, faapea foi peresetene ma taitai o tatou Autalavou. Ia viia lo tatou Alii, i la outou molimau atu, o fita i tuga ai mo le Alii ma le Tala Lelei, e ala atu i mataupu a le Aoga Aso Sa ma Autalavou.

Ua tatou talitonu, o le Tusi Paia o le Upu a le Atua mo tagata uma, ma ua i ai i totonu vaega uma ua tatou naunau ia iloa, ina ia tumau mausali pea lo tatou sootaga lelei ma le Atua, ma ia tatou ola ai i le ala tatau e tusa ma lona finagalo. O le mea lea ua tatou talitonu ai, i le matuā taua o le a'oa'oina tatau o fanau laiti ma talavou mai le Tusi Paia. E ao ina a'oa'oina atu ma le faautauta lelei, le uiga moni o vaega o le Tusi Paia ua fia a'oa'oina atu, i se auala talafeagai e tusa ma le matutua ua i ai tamaiti.

1. O le Tusi o Aoga Aso Sa ma Autalavou, ua saunia lava faapitoa mo Aoga Aso Sa ma Autalavou a le Eklesia Faapotopotoga Kerisiano Samoa. O lona uiga o le meatotino lava a le EFKS, e le faatagaina faaletulafono ona toe lomia e se tasi, e aunoa ma le faatagaga a le Eklesia. O lea e fautuaina ai foi le Aufaigaluega, o faiaoga o Aoga Aso Sa ma Taitai o Autalavou, i le taua o le teu faalelei pea o Tusi Aoga, e toe saili i ai mo se fesoasoani pe a momia.
2. O Mataupu o Tusi Aoga Aso Sa ma Autalavou 2024, ua maua lea i le upega Tafailagi (website) a le EFKS; [www.cccs.org.ws](http://www.cccs.org.ws). Faamolemole ia fesootai mai lo tatou Ofisa i Mulinuu mo se fesoasoani, ma nisi vaega e fia malamalama i ai, i le telefoni 24340, po o le [e-meli-extneduc@cccs.org.ws](mailto:e-meli-extneduc@cccs.org.ws).
3. Ua lē o toe fa'aalia i le faasologa o Mataupu i Aso Sa taitasi, vaega masani o le a'oa'oina o mataupu, e pei o le Tatalo Amata, Faafeiloai le vasega, faamanatu mataupu talu ai, tatalo e faapaia ai le sene ma le Tatalo Faaiu. Peitai o vaega masani nei e tatau lava ona fai i Mataupu o Aso Sa taitasi.
4. Mo le silafia e Tamā o le Eklesia ma le aufaigaluega faifeau, e i ai le taimi e toe saili mai ai e lo outou mamalu le ofisa o le MAK, mo nisi Tusi Aoga. Peitai, ua māua e le ofisa nei, o nisi tagata, e lē o ni tagata lotu īā tatou, auā latou te leiloa le suafa o lana faifeau. O lea e tatalo atu ai, o le a lē toe taliaina ni tagata faapea e omai i ni Tusi, sei vagana faafeagaiga ma ē omai ma se faamaoniga mai lana faifeau. E lē mafai foi ona faamatuu atu ni Tusi Aoga i nisi o la matou aufaigaluega e aunoa ma se faamaoniga mai le faifeau.

5. Afai ua i ai se lape i le galuega nei, e matua atu i la outou tofā faale-Atua e magalo ai le aufaigaluega vaivai. Pe afai foi e i ai ni fautuaga taua mo le faaleleia atili o le galuega, faamolemole fesoota'i mai lo tatou Ofisa i tuatasi o i luga, pe lafo mai i le Pusa meli 163, Apia.
6. Ua saunia le Tusi Aoga mo le Vasega Amata 2024, e le susuga ia Apelu Lelevaga FS, faletua ia Temukisa Tanielu, Faanati Matamu ma Eirenei Faaui.

Ia faamanuia le Atua i le galuega o lenei tausaga, auā le a'oa'oina o alo ma fanau a le Ekalesia, ina ia tutupu a'e ma le fiafia e faitau le Tusi Paia ma ola matata'u i le Atua.

Soifua ma ia manuia  
O la outou auauna

*Maleifua Tanielu*  
**(Faatonu A'oa'oga Kerisiano)**

## **FAASOLOGA MATAUPU VASEGA AMATA 2024**

### **MANATU AOAO: O LE ATUA E OU MEA UMA**

#### **IANUARI – MATI: NA FAIA E LE ATUA MEA UMA**

28	Na faia e le Atua le malamalama (ASO SA O TUPULAGA)	Kenese 1: 1 – 5
----	--	-----------------

#### **FEPUARI:**

4	Na faia e le Atua vanimonimo ma vai	Kenese 1: 6 – 8
11	Ua tuuveseeseina le eleele matutu ma le vai	Kenese 1: 9 – 10
18	Na faatupu e le Atua laau i le eleele	Kenese 1: 11 – 13
25	Na faia e le Atua le la, masina ma fetu	Kenese 1: 14 – 19

#### **MATI:**

3	O i'a i le sami ma manulele na faia e le Atua	Kenese 1: 20 – 23
10	O manu vaefa ma manu fetolofi na faia e le Atua	Kenese 1: 24 – 26
17	O le Atua na faia le tagata	Kenese 1: 27 – 28
24	Ua maliu atu Iesu i Ierusalem (Aso Sa Laupama)	Ioane 12: 12 – 15
31	Ua Toetu Iesu (Aso Sa Toetu)	Mataio 28: 5 – 6

#### **MANATU TAIALA APERILA – IUNI: O LE FAAOLA SILI**

#### **APERILA**

7	O Ioane le Papatiso	Mataio 3: 1 – 6
14	O Iesu ma le ma'i supa	Mareko 2: 1 – 12
21	Ua papatisoina Iesu e Ioane	Mareto 1: 9 – 11
28	Ua faaola e Iesu le teineitiiti	Mareko 5: 35 – 43

#### **ME**

5	O Toma le so'o lē talitonu	Ioane 20: 19 – 29
12	O Taupou e toa sefulu (Aso Sa o Tinā)	Mataio 25: 1 – 13
19	Malologa o le Fono	
26	Ua faalata Iesu e Iuta	Mataio 26: 3 – 5, 14 – 16, 49

#### **IUNI**

2	O le mamoe e tasi na leiloa	Luka 15: 3 – 7
9	O le faiva o le au soo	Luka 5: 1 – 7
16	O le faresaio ma le ao lafoga	Luka 18: 9 - 14
23	Ua valaau Iesu iā Sakaio	Luka 19: 1 – 10

30	O le mauga o Olive	Luka 19: 41 – 44
----	--------------------	------------------

### **MANATU TAIALA IULAI – SETEMA: IA LOTO ALOFA**

#### **IULAI**

7	Ua alofa Ionatana iā Tavita	1 Samuelu 19: 1 – 4
14	Ua agalelei le Atua iā Iopu	Iopu 42: 12 – 15
21	Ua faamalolo e Iesu tagata mama'i	Mataio 15: 29 – 30
28	Uafafaga e Iesu le motu o tagata	Mareko 8: 1 – 6

#### **AOKUSO**

4	O le tatalo a le Alii	Mataio 6: 9 – 13
11	Iopu le tamā amiotonu (Aso Sa o Tamā)	Iopu 1: 1 – 5
18	Ua faamalolo e Iesu le tagata tauaso	Ioane 9: 1 – 7
25	Ua fufulu e Iesu vae o ona so'o	Ioane 13: 1 – 5

#### **SETEMA**

1	Ua valaau le Atua iā Samuelu	1 Samuelu 3: 1 - 14
8	O Tavita le faipese	1 Samuelu 16: 14 - 23
15	O le tama na loto foa'i	Ioane 6: 1 - 13
22	O Iosefa le atalii o Iakopo	Kenese 37: 2 – 4
29	O le Samaria Agalelei	Luka 10: 29 – 37

### **MANATU TAIALA OKETOPA – TESEMA: IA FIAFIA LE LALOLAGI UMA**

#### **OKETOPA**

6	Tapenaga o le Lotu Tamaiti	
13	Lotu Tamaiti	
20	Malologa	
27	Ua faaolaina e Iesu le tagata oti	Luka 7: 11 – 17

#### **NOVEMA**

3	Ua avea Esekia ma tupu i Iuta	2 Tupu 18: 1 – 3
10	O Samasoni le tama malosi	Faamasino 14: 5 – 7
17	Ua toe faatasi Iosefa ma lona aiga	Kenese 47: 1 - 12
24	Ua faamaloloina le lepela e Iesu	Mataio 8: 1 – 4

#### **TESEMA:**

1	O le foa'i sili a le Atua	Isaia 9: 6 – 7
8	Ua fa'aali le agelu iā Maria	Luka 1: 26 – 31

## **VASEGA AMATA 2024**

**MANATU AOAO: O LE ATUA E OU MEA UMA**

**MANATU TAIALA O IANUARI - MATI: NA FAIA E LE ATUA MEA UMA**

Ua filifilia le manatu taiala e pei ona tā'ua i luga e fa'aautū i ai mataupu o masina o Ianuari, Fepuari ma Mati e a'oa'oingai ai le fanau i mea o le foafoaga na faia e le Atua.

**ASO SA: 28 IANUARI 2024 (ASO SA O TUPULAGA)**

**MATAUPU: NA FAIA E LE ATUA LE MALAMALAMA**

**SINI:** Ia malamalama le vasega, o le malamalama, na faia muamua e le Atua.

**TUSI FAITAU:** Kenese 1: 1 – 5 (MO LE FAIAOGA)  
Kenese 1: 3 (MO LE VASEGA)

Ua fetalai mai le Atua, " Ia malamalama, " ona malamalama ai lea.

**FESOASOANI MO FAIAOGA:**

A o lei faia e le Atua mea uma i le amataga, sa soona nunumi ma gaogao le lalolagi. E leai se mea e mafai ona iloaina atu, auā sa pouliuli. Ua silasila mai le Atua, e lelei le faia o le malamalama, auā e mafai ona iloa ai le mananaia o mea o le foafoaga. O le malamalama, e iloa ai foi le auala e savali ai pe a oo mai le po.

A leiloa foi se tupe i le po, e aogā le malamalama e su'e ai. E faapenā foi pe afai meaa'oga ma faitau le Tusi Paia, e manaomia le malamalama. O le mana'o o le Atua, ia faia muamua le malamalama, auā e iloa atu ai mea uma. Ona fetalai mai lea o le Atua, "Ia i ai le malamalama," ona malamalama ai lea o le lalolagi pogisa. Ua faaigoa foi e le Atua le malamalama o le ao, a o le pogisa o le po.


O le mea muamua lea o le foafoaga na faia e le Atua i le ulua'i aso.

**GALUEGA FAATINO:** Faaigoa Ata

Ta'u mai e tamaiti igoa o ata ua faailoa atu i lalo, ua tatou maua ma ai le malamalama. (ata o le la, masina, fetu, moliuila ma le afi.

**PESE:** O le alofa o le Atua, e ofooofogia.

**A'OA'OGA:** 1. E taua le malamalama e iloa ai mea uma.  
2. Galulue pe a oo mai le malamalama.





**ASO SA:** **04 FEPUARI 2024**

**MATAUPU:** **NA FAIA E LE ATUA LE VANIMONIMO MA VAI.**

**SINI:** Ia malamalama le vasega, o le vanimonimo ma vai, na faia i le Aso lua.

**TUSI FAITAU:** KENESE 1: 6 – 8 (MO LE FAIAOGA)  
KENESE 1 8 (MO LE VASEGA)

Ua faaigoa e le Atua le vanimonimo, o le lagi. O le afiafi ma le taeao, o le aso lua lea.

**FESOASOANI MO FAIAOGA:**

O le aso muamua na faia ai e le Atua le malamalama, a o le aso lona lua na faia ai e le Atua le vanimonimo po o le lagi, ma vai.

O vai ia e tā'ua i le mataupu i le aso Sa lenei, o timuga mai le lagi, ma vaitafe o lo o i lalo o le lagi. O ao o le lagi, ua i ai le suāvai, lea e faapea o vai i luga o le vanimonimo po o le lagi. E ese le aogā o le vai mo tagata. O vai e feinu ai, e ta'eele ai pe a palapalā le tino, e faasūsū ai laau totō, e faainu ai foi ma lafu manu. O le vai foi, e faamamā ai lavalava. O timuga mai le lagi e lelei ma mama.

O le vanimonimo ua mafai ona fa'aaogā e feoa'i ai manu felelei, ma fa'aaogā e feoa'i ai tagata i isi atunu i vaalele. O le mea lea na mana'o ai le Atua, e fai le vanimonimo ma vai, e aoga mo tagata uma o le lalolagi.

**GALUEGA FAATINO:**

E manaia pe a ave tamaiti i fafo ma faamatamata i le lagi ma ao. Vaai ni ata o ni vaitafe e faamatamata ai le fanau.

Valivaligā Ata: Tufa i tamaiti ata o le lagi ma ao; o manu felelei, o vaitafe o feinu ai manu ma tagata, e valivali pe faaigoa mai e tamaiti.

**PESE:** My God is so big//O le Atua e tele.

**A'OA'OGA:** 1. O le vanimonimo e feoa'i ai manulele.  
2. E tele aogaā o vai iā i tatou.

## UA FAIA E LE ATUA LE VANIMONIMO



**UA FAIA E LE ATUA LE VANIMONIMO MA VAI**



<b>ASO SA:</b>	<b>11 FEPUARI 2024.</b>
<b>MATAUPU:</b>	<b>UA TUUESEESEINA LE ELEELA MATUTU MA LE VAI.</b>
<b>SINI:</b>	Ia malamalama le vasega, o le Aso tolu na tuueseese ai e le Atua le eleela matutu ma vai.
<b>TUSI FAITAU:</b>	KENESE 1: 9 – 10 (MO LE FAIAOGA) KENESE 1 9 (MO LE VASEGA)

Ua fetalai mai foi le Atua. Ia potopoto i le mea e tasi o vai i lalo le lagi, ia iloa foi le eleela matutu; i le ua faapea lava.

### **FESOASOANI MO FAIAOGA:**

O le tuueseeseina o le eleela matutu ma le vai, na maua ai le laueelele ma le sami. O le eleela, ua maua ai le palapala, ma mafai ona ola ai laau. O le elelele foi, ua fai ma nofoaga o nisi o meaola na faia e le Atua. Ua fa'aaoga foi e toto ai faatoaga ma fai ai fale e nonofo ai tagata.

O le sami, o le nofoaga o i'a, e feoa'i ai foi tagata i vaa. O le eleela ma le sami, e fesoasoani e maua ai meaai mai faatoaga, ma i'a e aai ai pe a o tagata e fagogota. A faatau foi fua o le faatoaga ma i'a o le faiva, e maua ai tupe. O le aoga lea o le eleela ma le sami mo le ola o tagata i aso uma. O le aoga foi o le sami, ua mafai ona o ai i isi atunuu i luga o vaa.

### **GALUEGA FAATINO: TUSIGĀ ATA**

Fautuaina faiaoga e saili ni ata, e faamatala le tala ma fa'aali i tamaiti e saga malamalama ai.

Tusiga Ata. E lelei pe a faatonu tamaiti e tusi ata o laau o loo ola i le elelele faapea foi ata o le vai o loo i ai se vaa. A maea ona valivali lea o ata a tamaiti.

<b>PESE:</b>	O le eleela na faia e le Atua Na faia e le Atua x 2 O le eleela na faia e le Atua Fiafia ai tatou uma
	O le vai mamā e maua ia Iesu E maua ia Iesu x 2 O le vai mamā e maua ia Iesu Fiafia ai ma filemu (fati: Iesu, le uo a tamaiti)

<b>A'OA'OGA:</b>	1. E tele laau o loo ola i le eleela 2. E fesootai atunuu i le sami.
------------------	---

## UA TUUESEESEINA LE EEELE MATUTU MA LE VAI



**ASO SA:** **18 FEPUARI 2024.**

**MATAUPU:** **NA FAATUPU E LE ATUA LAAU I LE ELEELA**

**SINI:** Ia malamalama le vasega, o le Atua na faia ma faaola laau i le eleele.

**TUSI FAITAU:** KENESE 1: 11 – 13 (MO LE FAIAOGA)  
KENESE 1: 11 (MO LE VASEGA)

Ona fetalai mai lea o le Atua, Ia tupu le vao mu'a mai le eleele, ma le laau afu e tupu ma ona fua, ma le laau e 'aina ona fua, e fua mai e taitasi ma lona uiga, o iā te ia lava o ona fatu i luga o le eleele, i le ua faapea lava.

#### **FESOASOANI MO FAIAOGA:**

O nisi nei o mea na faia e le Atua i le aso lona tolu, e i ai laau ma vao. O mea uma na faia e le Atua, e i ai o latou sootaga taua. O le timu, e faasusu ai le eleele, lea e ola ma tutupu ai laau. O le eleele, e maua ai meaai a le laau. O laau, e aoga e maua ai meaai ma vai mo tagata e pei o le niu, esi, mago, moli, kukama ma isi fualaau aina. Ua i ai foi isi laau e pei o talo, fai, taamu, ulu ma isi e tele. E aoga foi laau e nonofo ai manu felelei ma isi meaola. A vevela le la, e aoga laau e faapaolo ai. O laau foi e fai ai laupapa e fau ai fale e nonofo ai tagata. O le isi aoga o laau e maua ai le 'ea lelei e manavaina e tagata. O aoga ia o laau na mafua ai ona faia e le Atua, ina ia ola lelei ma malosi le tagata.

#### **GALUEGA FAATINO: FAAIGOA ATA**

E aoga le fa'aaoga o ata e fai ai galuega faatino a le fanau. Vaai ni ata o laau e maua i Samoa e pei o le niu, esi, mago, fai, talo, taamu ma isi laau taatele. Faaali i tamaiti ma fai iai e tau mai igoa o laau. E faapena foi i fualaauaina masani, apu, moli, fai pula, kukama ma isi fualaauaina faaigoa e le fanau. Faamatala le faatinoina o se meaai i le fanau e faaago ai fualaau, faataitaiga o le faatinoina o se kuka e ave ai kapisi ma kukama.


- PESE:**
1. Na faia e le Atua o vao, loi ma laau x 3  
Ua faamanuia i lo'u aiga.
  2. Na faia e le Atua i'a ma figota o le sami x 3  
Ua faamanuia i lo'u aiga
  3. Na faia e le Atua manulele, o i le lagi x 3  
Ua faamanuia i lo'u aiga.
1. God made the grass, the ants and the trees x 3  
God blessed me and my family
  2. God made the fish, the shells and the sea x 3  
God blessed me and my family

3. God made the birds that fly in the sky x 3  
God blessed me and my family

**A'OA'OGA.**

1. E tele aoga o laau.
2. O laau, e tutupu mai i le eleele

## NA FAATUPU E LE ATUA LAAU I LE ELEELA



## NA FAATUPU E LE ATUA LAAU I LE ELEEL



**ASO SA:** **25 FEPUARI 2024.**

**MATAUPU:** **NA FAIA E LE ATUA LE LA, MASINA MA FETU**

**SINI:** / Ia malamalama le vasega, o le la, o le malamalama tele i le ao, a o le masina ma fetu, o le malamalama itiiti i le po.

**TUSI FAITAU:** KENESE 1: 14 – 19 (MO LE FAIAOGA)  
KENESE 1: 16 (MO LE VASEGA)

Ona faia lea e le Atua o malamalama tetele e lua; o le malamalama tele e pule i le ao, a o le malamalama itiiti e pule i le po, ua na faia foi fetu.

#### **FESOASOANI MO FAIAOGA:**

O le aso lona fa na faia ai e le Atua le la, masina ma fetu. O malamalama ia e iloa ai le ao ma le po. A oso le la i le taeao, ua oo mai le aso fou. E malamalama uma le lalolagi pe a oso ae le la, o le taimi fo'i lea e fai ai galuega ma usu ai outou tamaiti i le aoga. E tele aoga o le la mo aso uma. E faamamago ai tagamea a tina, e mafai ona fai ai galuega a tama e pei o le faatoaga ma alu e fagota. E faapena foi i le masina ma fetu i le po. E aoga le masina ma fetu e faamalamalama ai le pogisa o le po. A o malamalama foi ia e iloa ai aso, masina ma tausaga. Ua silasila mai le Atua, ua lelei ma aoga malamalama o le la, masina ma fetu mo le tagata, ona Ia faatumauina ai lea o le la, masina ma fetu i le lagi.

#### **GALUEGA FAATINO: TUSIGĀ ATA**

O tala o le faia ai e le Atua o mea uma po o tala o le foafoaga, e aoga lava ata e faamalamala atili ai i le fanau le mataupu. E manaia pe a faaaoga ata o le la, masina ma fetu e faaali i tamaiti. Ona faatonu lea o le fanau e tusi mai ata o le la , masina ma fetu ma faaigoa. E manaia foi pe a fa'aaoga ni cardboards e 'oti'oti e tamaiti foliga o le la, masina, ma ni fetu, ma fa'aaoga vali e valivali ai.

#### **FESILI MA TALI:**

1) O le a le aoga o le la?.

Tali: E faamamago ai tagā mea a tina.

2) O le a le aoga o le masina ma fetu?.

Tali: E faamalamalama ai le pogisa o le po

3) O ai na faia le la, masina ma fetu?.

Tali: O le Atua.

4) A susulu le la i le ao, o le a le 'ea tatou te lagonaina?


Tali: O le vevela.

**PESE:** O le Atua na faia le la, masina ma fetu.

**A'OA'OGA:**

1. E tele aoga o le la pe a susulu mai.
2. O le masina ma fetu e matagofie i le po.

## **NA FAIA E LE ATUA LE LA, MASINA MA FETU**



**ASO SA:** **03 MATI 2024.**

**MATAUPU:** **O I'A I LE SAMI MA MANULELE NA FAIA E LE ATUA**

**SINI:** Ia malamalama le vasega, o i'a uma o le sami ma manulele, na faia e le Atua.

**TUSI FAITAU:** KENESE 1: 20 – 23 (MO LE FAIAOGA)  
KENESE 1 20 (MO LE VASEGA)

Ua fetalai mai foi le Atua, Ia tele ona tutupu mai i le sami o mea ola e fetolofi, ia lele foi le manu lele i luga o le laueelele i le va nimonimo o le lagi.

#### **FESOASOANI MO FAIAOGA:**

O mea nei na faia e le Atua i le aso lona lima. O i'a o le sami ma manulele. E ese le tele o meaola e maua i le sami e pei o ia, figota ma laau(sea plants). O nisi nei o ia e masani ona maua mai i le sami o le poge, gatala, fee, fai, malie ma le tele o ia eseese ma le felanulanuai, o figota e iai tugane, tuitui, sea, paa, ula, aliao, faisua ma le tele foi o isi figota eseese. O laau sami o limu ma isi foi laau eseese.

E aoga i'a ma figota e maua ai meaai mo tagata uma. E maua ai foi tupe pe a faatau tau i'a, o fagu sea, ato tuitui. E faapena foi i manulele. E tele foi manulele eseese ma le felanulanuai e masani ona tatou vaai i ai. E pei o le lupe, segasega, gogosina o moa. E i ai foi manulele e masani ona tatou vaai ai i ata e pei o le aeto. E aoga foi manulele e maua ai meaai, pe a fai le supo moa ma le falai moa. E taua foi manulele e feaveai ai fatu laau e faasalalau i le eleele, e tele ai laau e tupu ma ola solo i le laueelele.

Tamaiti, e ese le lelei o mea e faia e le Atua mo tatou.

**GALUEGA FAATINO:** Faamatala le tala ma fa'aali ata.

Fa'aaoga ni ata o ia ma manulele e faamatamata ai le fanau.

**Valivaliga Ata:** Fai ni kopi o ata ua saunia (i'a, manulele) ia tofu le tamaitiiti ma le ata e valivali

- PESE:**
1. Na faia e le Atua o vao, loi ma laau x 3  
Ua faamanuia i lo'u aiga.
  2. Na faia e le Atua i'a ma figota o le sami x 3  
Ua faamanuia i lo'u aiga
  3. Na faia e le Atua manulele, o i le lagi x 3  
Ua faamanuia i lo'u aiga.

1. God made the grass, the ats and the trees x 3  
God is blessed me and my family
2. God made the fish, the shells and the sea x 3  
God is blessed me and my family
3. God made the birds that fly in the sky x 3  
God blessed me and my family


**A'OA'OGA:**

1. E tele i'a o le sami e tele foi manu felelei i le lagi.
2. O i'a ma manulele e aoga i lo tatou ola.

## O IA I LE SAMI MA MANULELE NA FAIA E LE ATUA



## O IA I LE SAMI MA MANULELE NA FAIA E LE ATUA



**ASO SA:**           **10 MATI 2024:**

**MATAUPU:**       **O MANU VAEFA MA MANU FETOLOFI NA FAIA E LE ATUA**

**SINI:**              Ia malamalama le vasega, e aoga manu vaefa ma manu fetolofi

**TUSI FAITAU:**     KENESE 1: 24 – 26 (MO LE FAIAOGA)  
                        KENESE 1: 20       (MO LE VASEGA)

Ua fetalai mai foi le Atua, Ia tutupu mea ola mai le laueelele, e taitasi ma lona uiga, o manu vaefa fanua, ma mea fetolofi ma manu vaefa o le vao, e taitasi ma lona uiga; i le ua faapea lava.

**FESOASOANI MO FAIAOGA:**

O le aso lona ono na faia ai e le Atua o manu vaefa fanua, o manu vaefa o le vao ma mea fetolofi. O manu vaefa fanua, ua i ai manu o lafu manu e pei o puaa, povи, mamoe ma isi. E i ai foi manu ua mafai ona faalata e pei o le maile ma pusi. O manu vaefa o le vao, o manu feai (wild animals), e i ai leona, urosa (bear), taika (tiger) ma isi manu feai o le vao. O meaola fetolofi o loi, atualoa, anufe, apogaleveleve ma le tele o isi manu fetolofi. E aoga foi isi manu vaefa e fai ai meaai e pei o le mamoe, puaa ma povи, lea e fai ai keke puaa, o le falai fasipovi (steak) ma le falai mamoe. Ae aoga foi pa'u o manu nei e fai ai mea taulima. O pa'u o povи, e fai ai fusipa'u ma lavalava. O mea uma lava na faia e le Atua, e aoga ma lelei mo tagata i aso uma o le ola.

**GALUEGA FAATINO:**   Faamatala le tala ma fa'aali ata

1.   E manaia pe a fa'aaoga ata o manu vaefa e faailoa ai le eseesega o manu vaefa fanua ma manu vaefa o le vao. Ata o povи, puaa, ma mamoe. Faailoa foi ata o manu vaefa o le vao e pei o le leona, urosa, afa luko, taika ma nisi ata o manu vaefa o le vao. Fa'aali mai foi ni ata o iniseti (insects) e pei o le loi, mogamoga, atualoa, apogaleveleve ma isi iniseti e masani ona vaai ai tamaiti.
2.   E manaia foi ae faapipii ata o manu nei i le laupapa, ona auaua'i atu lea o le fanau e faasino le manu ma ta'u lona igoa.

- PESE:**
1.   Na faia e le Atua o vao, loi ma laau x 3  
Ua faamanuia i lo'u aiga.
  2.   Na faia e le Atua i'a ma figota o le sami x 3  
Ua faamanuia i lo'u aiga
  3.   Na faia e le Atua manulele, o i le lagi x 3  
Ua faamanuia i lo'u aiga.
1.   God made the grass, the ants and the trees x 3  
God blessed me and my family
  2.   God made the fish, the shells and the sea x 3  
God blessed me and my family

3. God made the birds that fly in the sky x 3  
God blessed me and my family

- A'OA'OGA:**
1. E aoga manu uma na faia e le Atua.
  2. E lelei mea uma na faia e le Atua.
  3. Ia tausi lelei manu mai le Atua.

## O MANU VAEFA NA FAIA E LE ATUA



## NA FAIA E LE ATUA MANU FETOLOFI



**ASO SA:**           **17 MATI 2024.**

**MATAUPU:**       **O LE ATUA NA FAIA LE TAGATA**

**SINI:**              Ia malamalama le vasega, o le Atua na faia i tatou.

**TUSI FAITAU:**     KENESE 1:27 – 28 (MO LE FAIAOGA)  
                          KENESE 1: 27        (MO LE VASEGA)

Ona faia lea e le Atua o le tagata i lona faatusa, o le faatussa o le Atua na ia faia ai o ia; na faia e ie o i laua o le tane ma le fafine.

**FESOASOANI MO FAIAOGA:**

Ua uma ona faia e le Atua o mea uma i le lagi ma le lalolagi, ona Ia faia ai lea o le tagata. O le aso lona ono na faia ai e le Atua le tagata, ma fauma ai galuega a le Atua mo le lalolagi. O le tagata foi, o le atoatoaga lea o galuega a le Atua, aua o le tagata na faia i le faatusa o le Atua. O mea uma foi na faia e le Atua i le lagi ma le lalolagi, e aoga ma lelei mo le tagata. Na fai e le Atua le tamaloa ma faaigoa ia Atamu, a o le fafine na faaigoa ia Eva. O Atamu, o le uluai tama muamua lea o le lalolagi. E faapena foi ia Eva, o le tina muamua lea o le lalolagii po o tagata muamua ia o le lalolagi. O lona uiga tamaiti, o Atamu ma Eva, na maua mai ai tagata uma o le lalolagi.

Ua fiafia le Atua ia Atamu ma Eva, ma fai i ai le faatonuga a le Atua e vaai faalelei mea uma na Ia faia, e pule foi i lā'ua i ia mea uma. Na mana'o foi le Atua ia toatele le la fanau. E faapena foi ia Atamu ma Eva, ua fiafia ma ola lelei ona o mea na faia e le Atua. Ua maua meaai i fua o laau. O vaiinu mai vaipuna ma vaitafe. E fai foi o la ofu i laulaau ma pa'u o manu. E ese le alofa o le Atua i le tagata, aua na Ia faia i lona faatusa.

**GALUEGA FAATINO:    PASO (PUZZLE)**

1.      Tusi se ata o le tamaloa ma le fafine i se pepa malō (cardboard), ona 'oti'oti lea, ona galulue lea o le fanau e toe faapipii le ata. E lelei foi pe a saili mai nisi ata o tagata, o laau ma manu, e fai ai foi nisi paso mo le fanau.
2.      Valivaliga Ata:        E lelei pe a saili mai ata o mea uma o le foafoaga e fa'aaoga e le fanau.

**PESE:**              God made me/O le Atua na faia au

God made me  
God made you  
God made us to be, like Him  
With bright eyes, sweet smile  
Feeling happily  
God made us to be like Him

O le Atua na faia a'u  
O le Atua na faia oe

Na faia i tatou ia pei o Ia

O ou mata, lau ata

O lagona fafia

Na faia i tatou ia pei o Ia

(fati o le pese: This old man, he played one)

- A'OA'OGA:**
1. E alofa le Atua i le tagata.
  2. Na faia e le Atua le tagata.

## O LE ATUA NA FAIA LE TAGATA



**ASO SA:** **24 MATI 2024.**

**MATAUPU:** **UA MALIU ATU IESU I IERUSALEMA (Aso Sa Laupama).**

**SINI:** Ia malamalama le vasega, na tietie Iesu i le asini, a o afio atu i Ierusalem

**TUSI FAITAU:** IOANE 12: 12 – 15 (MO LE FAIAOGA)  
IOANE 12: 13 (MO LE VASEGA)

Ona ave lea e i latou o lau o pama, ma o mai e faafetaiai ia te ia; ona latou alalaga lea, “Osana! Ia manua le afio mai i le suafa o le Alii, o le Tupu o Isaraelu.”

**FESOASOANI MO FAIAOGA:**

O le Aso Sa lenei, o le Aso Sa o le Laupama, po o le aso o le malaga faatupu a Iesu i Ierusalem. O Ierusalem e tu i totonu o Isaraelu, po o le laumua foi o Isaraelu. Fai mai le tatou tala i lenei taeao, ua aga’i atu le malaga a Iesu ma ona soo i Ierusalem, a o tietie atu le Alii i le asini. E i ai se isi ua vaai i le manu lea o le asini?. (Fa’ali se ata o le asini i tamaiti).

Ua vaai mai tagata Ierusalem, ua tietie atu Iesu i le asini, ona latou o mai lea i le ala ua tutu ai ma laupama, ua latou pepese fiafia, ma fola laupama i le ala o afio atu ai Iesu. Ua latou valaau foi ma le leo tetele, "Osana! Ia manua lē afio mai i le suafa o le Alii, o le tupu o Isaraelu." Ua fiafia tagata Ierusalem ona o Iesu lea ua afio atu o Ia, o le tupu o Isaraelu.

**GALUEGA FAATINO:** Faatino le tala

Ia faatino muamua e faiaoga le tala i le malaga faatupu a Iesu, ona taumafai lea e faatino e le fanau.

**PESE:** "Osana Pepese Tamaiti Uma". (Pese o le laupama).

**A’OA’OGA:** 1. O Iesu le tupu o le lalolagi.  
2. Fiafia e faalogo i tala ia Iesu.

## UA MALIU ATU IESU I IERUSALEMA



**ASO SA:** **31 MATI 2024.**

**MATAUPU:** **UA TOETU IESU (Aso Sa o le Toetu)**

**SINI:** Ia malamalama le vasega na maliu Iesu ae na Toetu mai lava i le oti.

**TUSI FAITAU:** MATAIO 28: 5 – 6 (MO LE FAIAOGA)  
MATAIO 28: 6 (MO LE VASEGA)

“E le o iinei o ia; auā ua toe tu mai o ia, pei ona fetalai atu ai o ia. O mai, ina matamata i lea na tuu ai o ia.”

### **FESOASOANI MO FAIAOGA:**

Ua saunia ma tuuina atru le tala puupuu o le Toetu o le Alii, e manatu lava ina ia faatino e faiaoga ma le fanau, e avea ma mataupu o lenei Aso Sa taua.

E manaia foi ae tusia ma avatu i le fanau a latou faamatalaga o le tala i se aso o le vайасо, e suni mai aimo le faatinoga i le Aso Sa lenei.

### **TALA O LE TOETU**

Fesoasoani mo le Tala

O tagata o le tala(characters). Faamatala, tina e toalua, agelu, Iesu, ositaulauga, tagata na totogi tupe, soo, leoleo tuugamau.

### **Vaaiga muamua (Scene One).**

Faamatala: Ua malama le taeao o le Aso Sa ona o ai lea o Maria le tinā o Iesu ma Maria le Makatala ma teu fugalaau e asi ai le tuugamau o Iesu.

Maria le tinā o Iesu: " E ese le manaia o le susulu o le la i lenei aso."

Maria le Makatala: "Sa'o lelei oe, a'o ananafi sa pogisa atoa ai le lagi ma timu. Oi se ua galo ia te i taua e le mafai ona ta ave ese le maa o loo i le faitotoa o le tuugamau".

Maria le tinā o Iesu: " Ae sao foi oe, ae aua foi e le o se maa laititi, e oo foi i leoleo o loo vaaia le tuugamau, ailoga e mafaia ona latou fuli ese le maa mo taua".

Faamatala: A'o talatalanoa tinā nei ma mafaufau i se auala e fuli ese ai le maa, ae faateia loa i le lulu o le mafuie e uiga ese lona malosi.

Faatinoga (Actions): Fa'aaoga le piano e fai ai se leo mo le mafuie (sound track).

### **Vaaiga lua (Scene two): Fitafita fefe.**

Fitafita muamua : " Auoi! poo le a le uiga o lenei mafuie ua lulu uma ai le lalolagi"

Fitafita lua: "Ta fefe! vaai atu ia o le la ua fuli ese le maa sa pupuni ai le tuugamau e uiga ese lenei mea"

Fitafita muamua: " E leiloa pe sao lau vaai e pei lava ua leai se tino maliu i totonu o le tuugamau, sole o taua lava o vale ae ta nonofo pea ii".

Faamatala: O le fefe tele o fitafita i le malosi o le mafuie ma le fuli ese o le maa o le tuugamau na sosola ese ai ae taunu loa ma tina nei i le tuugamau.

Maria le Makatala: "E uiga ese lenei mafuie".

Maria le tina o Iesu: " Vaai atu ia o le la ua avanoa mai le gutu o le tuugamau ua fuliesea le maa sa pupuni ai. Poo ai na faia lenei mea".

Faamatala: Ua taunu tinā nei i le tuugamau ma ua ulufale ma iloa ai ua leai le tino o le Alii. Ua fefefe ma popole o la loto poo ai ua aveesea le tino o Iesu. Ae faateia loa i le tu mai o le agelu.

Agelu: "Aua te lua fefefe aua o Iesu lea e te lua sailia e lē o ii ae ua toetu o Ia e pei ona fai mai ai o ia. Ina o atu vave ma tau atu i ona soo e muamua atu o ia ia te outou i Kalilaila. Ia tau atu foi mea uma ua oulua vaai i ai."

Faamatala: Ona vave o ese ai lea o i laua ma le fiafia e tau atu le talalelei i soo o le Alii. A'o agai atu i laua i le ala ae latou fetaui ai ma Iesu.

Iesu: "Si ou alofa."

(Actuons). Tinā faapau i vae o le Alii ifo ma fetagisi ma pai atu i vae o le Alii.

Iesu: "Aua e te lua fefefe, ina o atu ia ma ta'u atu i o'u uso ma fai i ai ou te muamua atu i Kalilaila e pei ona tau atu e le agelu."

### **Vaaiga 3 (Scene 3 ).**

Faamatala: Ua oo atu e na leoleo i le tuugamau ma tau atu i le ositaulaga mea na tutupu i le tuugamau.

Fitafita 1; "Lau susuga i le Ositaulaga e matautia mea na ma vaai i ai, na e iloa le mafuie tele lea na lulu?".

Fitafita 2: "O le lulu lena o le mafuie na fuli ese ai le maa tele sa pupuni ai le faitotoa o le tuugamau, a'o le mea sili ona matautia, ou te vaai atu ua leai se isi i totonu o le tuugamau".


Ositaulaga: "Ioe na ou lagona le mafuie ae o le a lau tala ua leai se tino i le tuugamau.

Fitafita uma: O se mea lava e ofo ai lena, o le Aso tolu lenei talu ona i ai Iesu i le tuugamau. E moni lava ana folafolaga na fai, o le Aso Tolu e Toetu ai.

**A'OA'OGA:**

1. O lo o tatou faatasi ma Iesu.
2. O Iesu lo tatou Faaola.
3. E moni lava ua Toetu Iesu.

## **UA TOETU IESU**



## **MANATU TAIALA O APERILA – IUNI : O LE FAAOLA SILI**

Ua filifilia le manatu taiala e pei ona ta'ua i luga e aoaoina ai le fanau i masina o Aperila, Me, ma Iuni. O le faamoemoe, ia malamalama le fanau iā Iesu, o Ia o le Faaola sili e pei ona faailoa i Mataupu ua tapenaina ma saunia.

**ASO SA:**                   **7 APERILA 2024**

**MATAUPU:**               **O IOANE LE PAPATISO**

**SINI:**                      Ia malamalama le vasega i le tagata e igoa ia Ioane.

**TUSI FAITAU:**           MATAIO 3: 1 – 6 (MO LE FAIAOGA)  
                                MATAIO 3: 4 (MO LE VASEGA)

A o Ioane ia, sa ofu ile fulufulu kamela, ma le fusi pa'u i lona sulugatiti; a o ana mea e 'ai, o se akerise ma le meli vao ia.

### **FESOASOANI MO FAIAOGA:**

O Ioane, o ona matua o Sakaria ma Elisapeta (Luka 1: 5 – 25, 57 – 80). O ia o le atalii o le ositaulaga..Na saunia e Sakaria le viiga e faailoa ai lona loto faafetai i le Atua, aua o lona atalii o Ioane, e muamua atu i luma o le Alii o Iesu e sauni ona ala (Luka 1: 61 – 39)

O le galuega a Ioane, o le saunia lea o le ala, o le Mesia po o Iesu, e ala i lona papatisoina o tagata i le vai o Ioritana. O lea papatisoga na faatonuina e Ioane, e tatau i tagata uma lava, ina ia saunia i latou mo le afio mai o Iesu.

Sa ofu o ia i le fulufulu kamela, ma le fusipa'u i lona sulugatiti, e pei o ofu o le au perofeta o le Feagaiga Tuai. Sa taumafai o ia i mea faatauvaa na maua i le vao naumati, o sē akerise ma le meli o le vao.

O Ioane le Papatiso, sa papatisoina Iesu i le vai o Ioritana.

### **Uiga o Upu:**

- i)       ositaulaga     -       fitaulaga/faifeau
- ii)      naumati       -       leai ni meaai  
                          leai ni vai.

**GALUEGA FAATINO:**   TALIGĀ FESILI

### **Fesili**

1.       O ai matua o Ioane le Papatiso?

Tali:   O Saskaria ma Elisapeta

2. O le a le galuega a Ioane sa fai?

Tali: O le papatisoina o tagata, aua le afio mai o le Mesia.

3. O a ofu a Ioane?

Tali: O le fulufulu kamela ma le fusipa'u.

4. O a mea sa 'ai ai Ioane?

Tali: O sē akerise ma le meli o le vao.


**PESE:** Create in me a clean heart, O God      } x2  
And renew a right spirit within me      }  
Cast me not away from your presence O Lord  
And take not your Holy Spirit from me  
Restore unto me the joy of your salvation  
And uphold me with a willing heart.

Le Atua e, ia e faia se loto mamā mo a'u } x2  
Ma faafou se loto mau i totonu      }  
'Aua e te lafoaiina, o a'u i ou luma  
'Aua foi e te aveeseina lou Agaga Paia  
Ia e faafoisia mai le olioli o le olataga  
Ma taofi mau i le loto fiafia

**A'OA'OGA:** 1. O Ioane le Papatiso, o le ave feau a le Atua.

2. Ia tatou saunia le ala mo le Alii.

## IOANE LE PAPATISO



**ASO SA:**           **14 APERILA 2024**

**MATAUPU:**       **O IESU MA LE MA'I SUPA**

**SINI:**              Ia malamalama le vasega, na faamalolo e Iesu le ma'i supa.

**TUSI FAITAU:**     MAREKO 2: 1 – 12    (MO LE FAIAOGA)  
                          MAREKO 2: 11 – 12    (MO LE VASEGA)

Ou te fai atu ia te oe, Ina tula'i ia, ina ave lou moega, ma alu atu i lou fale. Ona tula'i loa lea o ia, ua ave foi lona moega, ma savali ane i luma o i latou uma, .....

**FESOASOANI MO FAIAOGA:**

Ua maliu atu Iesu ma ona soo i Kapanaumi, ua oo atu i le fale ua faatumulia i le motu o tagata e fia faalogologo ma vaavaai i ana vasega. Ua o mai foi tagata e to'afa, ua fata mai le tagata ma'i supa. Ua le mafai e i latou ona aumai i luma o Iesu le ma'i supa, ona ua leai se avanoa i le tumutumu o tagata i le fale.

Ona o ai lea o i latou i le pito i luga, ma tatala le ufi o le fale. Ona tuutuu ifo ai lea o le ma'i supa i luma o Iesu. Ua silafia e Iesu lo latou faatuatua, ona fetalai atu ai lea o ia i le ma'i supa, "Ou te fai atu iā te oe, inā tula'i ia, inā ave lou moega, ma alu atu i lou fale.

Ua tu i luga le ma'i supa, ua malosi, ma ua ave e ia lona moega, ma savali ane i luma o tagata sa i ai. Ua taufaiofo i latou uma ma vivii atu i le Atua.

**Uiga o Upu:**

i)        ma'i supa        -        Le mafai ona gaioi le tino atoa. Pepē musele o le tino (Paralyze)

**GALUEGA FAATINO:**    Taligā Fesili/Faatino Le Tala

Ia fai fesili ua saunia ma faatino le tala e pei ona faamatalaina i le Mataupu.

**FESILI MA TALI:**

1.       O le ā le ma'i lea na aumai iā Iesu?

Tali:   O le ma'i supa

2.       Na faapefea ona aumai lenei ma'i supa iā Iesu?

Tali:   Na aumai e tagata e toafā i luga o le fata.

3.       Aisea na iloa ai e Iesu le faatuatua o nei tagata na latou aumaia le ma'i supa?

Tali:   Auā na o mai loa ua tumu atoa le fale, ona latou o a'e lea i luga o le fale ma tatala lona ufi, ona tuutuu ifo lea o le ma'i supa i luma o Iesu.

**PESE:** E LEAI SE SILI ATU IA IESU  
THERE'S NO ONE LIKE JESU

E leai se sili atu ia Iesu      }  
E tu tasi lava o Ia      } x 2  
Sailiili i i ma o  
Ma su' esu'e i so o se mea  
Taamilomilo i i ma o  
E tu tasi lava Iesu

There's no one there's no one like Jesus      }  
There's no one there's no one like Him      } x 2  
I look around, here and there  
I check, check, check, everywhere  
I turn around, here and there  
There's no one, there's no one like Him

**A'OA'OGA:**      1.      E mafai e Iesu ona faamalolo i so o se ma'i.  
                      2.      Ia tatou loto fesoasoani i tagata mama'i.  
                      3.      O Iesu le foma'i sili.

## O IESU MA LE MA'I SUPA



**ASO SA:** **21 APERILA 2024**

## MATAUPU: UA PAPATISOINA IESU E IOANE

**SINI:** Ia malamalama le vasega, na papatiso Iesu e Ioane i le vai o Ioritana.

**TUSI FAITAU:** MAREKO 1: 9 – 11 (MO LE FAIAOGA)  
MAREKO 1: 9 (MO LE VASEGA)

O ona po ia ua maliu atu ai Iesu mai Nasareta o i Kalilaia, ua papatisoina foi o ia e Ioane i Ioritana.

## **FESOASOANI MO FAIAOGA:**

I le amataga o le galuega faaola a Iesu, na maliu atu ai o ia mai Nasareta i Kalilaia, e aga'i atu iā Ioane le papatiso i le vai o Ioritana. O le finagalo o Iesu, ina ia papatisoina o ia e Ioane i le vai o Ioritana.

Ina ua uma ona papatisoina Iesu e Ioane, ma ua maliu a'e o ia nai le vai, ona iloa lea e ia le lagia masae po ua fa'aavanoa, ma ua afio ifo le Agaga Paia peisea'i se lupe i ona luga. Ua oo mai fo'i le si'ufofoga mai le lagia, ua faapea mai, "O lo'u Atalii pele oe, ou te fiafia iā te oe."

O le papatisoga tamaiti, o le sauniga paia lea a le Ekalesia Kerisiano, e faailoa ai, ua avea i tatou e fai ma atalii ma afafine o le Atua i totonu o le Ekalesia. O i tatou, o le ‘auaiga o le Atua.

GALUEGA FAATINO: VALIVALIGĀ ATA

Ia fai ni kopi o le ata e tufa i le vasega e galulue ai.

**PESE:** WE ARE ONE BIG HAPPY FAMILY  
/O I TATOU O LE 'AUAIGA O LE ATUA

We are one big happy family  
God's family, God's family  
We are one big happy family  
God's family are we

O i tatou o le ‘auaiga  
Fiafia o le Atua  
O i tatou o le ‘auaiga  
Fiafia o le Atua

He is my brother  
She is my sister  
Our father in Heaven  
Who loves you and me

O oe o lo'u tuagane  
O oe o lo'u tuafafine  
Le Tama, o i luga  
E alofa ia i ta'ua

**A'OA'OGA:**      1.    Na papatisoina Iesu e Ioane i le vai o Ioritana  
                        2.    O Iesu, o le Atalii pele o le Atua

## UA PAPATISOINA IESU E IOANE



## UA PAPATISOINA IESU E IOANE



**ASO SA:** **28 APERILA 2024**

## MATAUPU: UA FAAOLA E IESU LE TEINEITIITI

**SINI:** Ia malamalama le vasega, o Iesu na toe ola ai le teineitiiti na oti.

**TUSI FAITAU:** MAREKO 5: 35 – 43 (MO LE FAIAOGA)  
MAREKO 5: 41 (MO LE VASEGA)

Ona tago ifo lea o ia i le lima o le teine, ma fetalai atu ia te ia, "Talita Kumi," o lona faamatalaga lenei, "Funa e, ou te fai atu ia te oe, ia e tula'i."

## **FESOASOANI MO FAIAOGA:**

Sa i ai se tasi tamā, o ia o le pule o le sunako po o le falesa. O ia e vaiaia ma tausia lelei mea uma i totonu o le falesa. Sa ma'i tigaina lona afafine, o lea na ia alu ane ai iā Iesu mo se fesoasoani. Na faate'ia o ia ina ua ta'u atu le tala mai nisi na o atu mai lona aiga, ua oti le teine. E le aogā one toe faalavelave iā Iesu a o fai lana galuega.

Ua faalogo atu i ai Iesu, ona fetalai atu lea i le pule o le sunako, “Aua e te mata’u, tau lava ina e faatuatua.” O le uiga o le fetalaga a Iesu, ia ‘aua ne’i fefe, ae tau lava ina talitonu ma faamoemoe atu iā te Ia. Ua oo atu i totonusi o le fale Iesu ma nisi o ona soo o Peteru, Iakopo ma Ioane, ona tulia lea o tagata uma na i ai i fafo. Ua fetalai atu fo’i i ē na fetagisi, “E le o oti le teine, ua na ona moe.”

Ona o atu ai lea o i latou faatasi ai ma matua o le teine i le mea o lo o ia taoto ai, ona tago ifo lea o ia i le lima o le teine, ma fetalai atu iā te ia, "Talita Kumi," o lona faamatalaga lenei, "Funa e, ou te fai atu ia te oe, ia e tula'i. Ona tu lea i luga o le teine, ua savali. Ua ofo tagata uma na i ai, auā ua toe ola mai le teine na oti.

Tamaiti, o le faatuatua o le tamā o le teine iā Jesu, na toe ola ai lona afafine na otī.

## GALUEGA FAATINO: VALIVALIGĀ ATA

Ia fai ni kopi o le ata ua saunia ma tufa i le vasega e galulue ai.

**PESE:** O lima o Jesu o lima agalelei/Jesus hands were kind hands

O lima o Iesu o lima agalelei  
E alofa ai i tagata uma  
E faamalolo i tagata mama'i  
Ma faamanuia i tamaiti

Jesus hands were kind hands  
Doing good to all  
Healing pain and sickness  
Blessing children small

O nai ona lima e auauna atu  
E tali i lau valaau  
O lima o Iesu o lima agalelei  
E alofa ai i tagata uma


Washing tired feet  
And saving those who fall  
Jesus hands were kind hands  
Doing good to all

**A'OA'OGA:**

1. Na toe faaola e Iesu le teineitiiti na oti.
2. Ia tatou talitonu ma faamoemoe iā Iesu.
3. E agalelei Iesu.

**UA FAAOLA E IESU LE TEINEITIITI**

## ‘UA FAAOLA E IESU LE TEINEITIITI



**ASO SA:**           **5 ME 2024**

**MATAUPU:**       **O TOMA LE SOO LE TALITONU**

**SINI:**              Ia malamalama le vasega, e le i talitonu Toma i le Toetu mai o Iesu.

**TUSI FAITAU:**     IOANE 20: 19 – 29 (MO LE FAIAOGA)  
                        IOANE 20: 25        (MO LE VASEGA)

“Afai ou te le vaai atu i ona lima, i mea na tutu’i ai fao, ma tuu lo’u tamatamai lima i mea na tutu’i ai fao, ma tuu lou lima i lona itu, ou te le talitonu lava.”

**FESOASOANI MO FAIAOGA:**

Ua oo i le afiafi o le ulua’i aso o le vaisapati, ua punitia faitoto’ a i le mea na potopoto ai e au soo o Iesu, ona o le fefefe iā Iutaia. Ua faateia i latou i le maliu atu o Iesu ma tu i totonu. Ua fetalai atu Iesu iā te i latou, “Ia outou manuia” Ua Ia fa’aali atu foi i ona soo ona lima ma lona itu. Ona latou olioli ai lea ina ua latou vaai atu i le Alii.

A o Toma, o le tasi o le au soo o Iesu, e le’i i ai o ia ma i latou ina ua maliu atu Iesu. Ua ta’u e le au soo iā Toma, na latou vaai i le Alii o Iesu. A ua fai ane Toma, afai e le tuu lona tamatamai lima i mea na tutu’i ai fao, na te lē talitonu lava.

Ua mavae aso e valu, ua toe faatasia foi Iesu ma ona soo, ona fetalai atu lea o Ia iā Toma, ina ina vaai i ona lima, ma aumai ona tamatamailima e tuu i lona itū, ma ia ‘aua foi le masalo vale, a ia faatuatua. Ona talitonu ai lea o Toma ma faapea ane, “Lo’u Alii e, ma lo’u Atua e!”

Ona fetalai at lea o Iesu iā Toma, “Toma e, ua e faatuatua, auā ua e vaai mai ia te a’u. Amuia o ē lē vaai mai, ae faatuatua mai pea.”

**GALUEGA FAATINO:**   **FAATINO LE TALA**

Ia faatino e le vasega le tala e pei ona faamatalaina.

**PESE:**              E leai se mea e le mafai  
                         Pe a e faatuatua i le Atua.  
                         E leai se mea e le mafai  
                         Pe a e faatuatua i Lana Upu  
                         Faalogo ia a o fetalai  
                         E leai se mea e le mafai  
                         Ia faatuatua i le Atua  
                         Ma lana Upu paia  
                         Ioe, e mafai so o se mea  
                         Ioe, e mafaia mea uma e le Atua

Nothing is impossible when you put your trust in God  
Nothing is impossible when you’re trusting in His word  
Hearken to the voice of God to thee

Is there anything too hard for me  
Then put your trust in God alone and rest upon His Word  
For everything, Oh everything  
Yes, everything is possible with God

**A'OA'OGA:**      1      Na fa'aali Iesu i le au soo ina ua toetu mai.  
                        2.      Na talitonu Toma ina ua vaai.



**ASO SA:** **12 ME 2024**

**MATAUPU:** **O TAUPOU E TOASEFULU (ASO SA O TINĀ)**

**SINI:** Ia malamalana le vasega, ia ola sauniuni ma tapenapena i soo se taimi.

**TUSI FAITAU:** MATAIO 25: 1 – 13 (MO LE FAIAOGA)  
MATAIO 25: 8 (MO LE VASEGA)

Ona fai atu ai lea o e vālea i e popoto; aumai ni a outou suauu ma matou, auā o le a mamate a matou molī,

#### **FESOASOANI MO FAIAOGA:**

O le tala lenei i taupou e toasefulu, na sauni ma tapena a latou moli, e o atu e faafetaia'i i le faato'āfaiavā. Ua popoto le toalima o i latou, ae vālea le isi toalima. O taupou vālea ua ave a latou molī, ae le'i avea ni a latou suauu faaleoleo. O taupou popoto, ua ave a latou molī, faatasi ma a latou suauu faasili.

Ua faatuai ona sau le faato'āfaiavā, ona momoe ai lea o i latou. Ua faafuasei ona valaau le agelu, “Faauta, ua sau le faato'āfaiavā, inā o ia outou e faafetaia'i iā te ia.”

Ua tutu i luga taupou e toasefulu ma tapenapena a latou molī. Peitai, ua aisi atu taupou vālea i taupou popoto, mo ni suauu mo a latou moli, ona ua mu itiiti. Ona tali atu lea o taupou popoto, ina ne'i le lava a latou suauu, ae sili ona latou ō e faatau mai ni a latou suauu.

Ua taunuu atu le faato'āfaiavā, ona latou ulufale faatasi lea ma taupou popoto e toalima, a o le isi toalima, e taunuu atu, ua tapuni le faitoto'a

Tamaiti, ‘ua e te manatu māmā i lau a’oga. Ia to’aga e fai au meaa’oga, auā e manuia le tagata e to’aga, tapenapena ma sauniuni, ae le o le ola faatamala.

#### **Uiga o Upu:**

- i) Faato'āfaiavā - faato'ā fai le toalua  
faato'ā faaipoipo

**GALUEGA FAATINO:** VALIVALIGĀ ATA


Ia fai ni kopi o le ata e tufa i le vasega e galulue ai.

**PESE:** Suauu i lau lamepa ia mu pea.

- A’OA’OGA:**
1. Ia sauniuni ma tapenapena i taimi uma.
  2. Faamoemoe i le Atua e manuia ai.
  3. ‘Aua le ola faatamala



## TAUPOU POPOTO



## TAUPOU VALEA



St-Takla.org

**ASO SA:**           **26 ME 2024**

**MATAUPU:**       **UA FAALATA IESU E IUTA.**

**SINI:**              Ia malamalama le vasega, o Iesu na faalataina e Iuta.

**TUSI FAITAU:**     MATAIO 26: 3 – 5, 14 – 16, 49           (MO LE FAIAOGA)  
                        MATAIO 26: 15                           (MO LE VASEGA)

“ua faapea atu, “Se a le mea tou te aumai ma a’u, ou te faalataina ai o ia ia te ootou?” Ona latou avane ai lea ia te ia o tupe e tolugafulu.

**FESOASOANI MO FAIAOGA:**

O ona po ia a o i ai Iesu i Ierusalem, na faapotopoto ai le au ositaulaga sili, ma toeaina o le nuu i le maota o le ositaulaga sili, e igoa ia Kaiafa. Ua latou taupulepule i se auala e mafai ai ona pu’e ma fasioti iā Iesu.

Ona alu ane ai lea o le tasi o soo o Iesu, e igoa iā Iuta le Sakara, i le au ositaulaga sili, ua ia fai atu iā i latou, “Se a le mea tou te aumai ma a’u, ou te faalataina ai o ia iā te outou?” Ona latou avane ai lea iā te ia o tupe e tolugafulu. Ona ia mafaufau ai lea i se itu aso e faigofie ai ona faalata Iesu.

A o i ai Iesu ma nisi o ona soo i le fanua o Ketesemane i le mauga o Olive, e tatalo ai i le Atua, ona sau ai lea o Iuta le Sekara ma fai atu iā Iesu, “Rapi e, si o’u alofa,” ona sogi ai lea o ia iā te Ia. Ona o mai ai lea o ositaulaga sili, ma toeaina o le nuu, faatasi ai ma le toatele o tagata, ua iā i latou o pelu, ma latou pu’e iā Iesu.

**Uiga o Upu:**

- |      |                 |   |                               |
|------|-----------------|---|-------------------------------|
| i)   | Ositaulaga Sili | - | Pule i le Au Faitaulaga       |
| ii)  | Tolugafulu      | - | Tolusefulu                    |
| iii) | Rapi            | - | O le a’oa’o po o le faia’oga  |
| iv)  | Sogi            | - | Kisi                          |
| v)   | Faalata         | - | Faapele                       |
| vi)  | Ketesemane      | - | O le fanua i le mauga o Olive |


**GALUEGA FAATINO:**    **FAATINO LE TALA**

Ia faatino e le vasega le tala e pei ona faamatalaina i le Mataupu.

**PESE:**              Oh! Yes I love this man o Galilee  
                        Ioe! Ou te alofa i le tagata Kalilaia

**A’OA’OGA:**        1.     Na faalataina e Iuta le Sekara Iesu.  
                        2.     ‘Aua le taupulepule leaga i isi.

## UA FAALATA IESU E IUTA



**ASO SA:**           **2 IUNI 2024**

**MATAUPU:**       **O LE MAMOE E TASI NA LEILOA**

**SINI:**              Ia malamalama le vasega, na fiafia le leoleo mamoe, ina ua toe maua lana mamoe e tasi na leiloa.

**TUSI FAITAU:**     LUKA 15: 3 – 7 (MO LE FAIAOGA)  
                        LUKA 15: 6       (MO LE VASEGA)

A oo atu foi i lona aiga, ua faapotopoto ai ana uo ma e tuaoi ma ia, ua fai atu ia te i latou, Ia tatou olioli ia ma a'u; auua ou maua lau mamoe na leiloa.

**FESOASOANI MO FAIAOGA:**

O le toatele o tagata i le vaitaimi na soifua ai Iesu i le lalolagi, e fai a latou lafu manu e pei o mamoe, povi, oti ma isi. O mea ia sa tausi ai o latou aiga, ma sa faitauina ai lo latou tamaoaiga. O le ala lea ua faamatalaina ai e Iesu lenei tala iā te i latou, ina ia latou malamalama i ai.

O le tagata sa i ai lana lafu mamoe e selau, peitai, ua sē le mamoe e tasi, ma ua leiloa. Ua avea lea tulaga ma ala ua tuuina ai e le leoleo mamoe ana mamoe e ivasefulu ma le iva, ae alu e saili mai le mamoe e tasi na sē. Ua maua mai le mamoe lea e tasi, ona ia faafuata ai lea ma le olioli. O lona uiga, ua sii le mamoe i luga o lona tau'au, ma fusi mau i ai, ma toe foi mai i lona aiga ma le fiafia tele. I le ua ia oo i lona aiga, ua potopoto mai ana uo, ma latou fiafia faatasi ma ia.

Tamaiti, o le alofa o le Atua, e faapei o le leoleo mamoe, ua ia tuu le toataele o i ai, a ua saili i le mamoe e tasi ua sē, ma le faamoemoe ina ia maua, ma toe aumai i le lafu mamoe.

**GALUEGA FAATINO:**    **VALIVALIGĀ ATA**

Ia fai ni kopi o le ata ua saunia e tufa i le vasega e galulue ai.

**PESE:**              Le leoleo mamoe lelei  
                        Ua e alofa i au mamoe  
                        Na te ave au i le vao mu'a  
                        E fafaga iā te a'u  
                        E ui lava ina ou savali  
                        I le vanu o le oti  
                        Na te saili mai  
                        Faafuata ma le olioli

**A'OA'OGA:**        1       E saili mai pea le Atua mo i tatou ona o lona alofa.  
                        2.      O Iesu lo tatou leoleo mamoe sili.

## O LE MAMOE E TASI NA LEILOA





## O LE MAMOE E TASI NA LEILOA



**ASO SA:** **9 IUNI 2024**

**MATAUPU:** **O LE FAIVA O LE AU SOO**

**SINI:** Ia malamalama le vasega, na usitai le au soo ia Iesu, ua manuia ai le latou faiva.

**TUSI FAITAU:** LUKA 5: 1 – 7 (MO FAIAOGA)  
LUKA 5: 6 MO LE VASEGA)

Ua uma ona latou faia o lea mea, ona latou siomia lea o le au i'a tele lava, ua masae ai lo latou upega.

**FESOASOANI MO FAIAOGA:**

A o i ai Iesu i luga o le auvai o Kenesareta, ua o atu ai foi ma le motu o tagata e fia faalogologo i ana a'oa'oga, o lea na maliu atu ai lea o Ia i le vaa o Simona, o lo o i le auvai, ma fai atu ia te ia, ina ia tuutuu ese le va'a nai le auvai. Ona nofo lea o Ia i lalo, ma aoao atu i tagata.

Ina ua uma le lauga a Iesu, ona Ia fetalai atu lea ia Simona, "Ina tuutuu atu ia i le loloto, ma tuu ifo ai o outou upega e maua ai ni i'a." O lea na tali atu ai Simona ia te Ia, ua tigaina i latou i le po atoa ae leai ni i'a na maua, ae ona o Lana fetalaga, o le a toe tuu ifo ai le upega. E lei leva ae o latou maua loa se aui'a tele, ua masae ai lo latou upega. Ona latou genogeno atu lea ia i latou i le tasi vaa, se'i o ane e fesoasoani ia i latou. Ua faatumu e i latou vaa e lua, na tali gogoto i le mamafa ma le tele o i'a na maua.

Tamaiti, o le usitai o Simona i le fetalaga a Iesu, na ala ai ona maua e i latou le anoano o i'a.


**GALUEGA FAATINO:** VALIVALIGĀ ATA

Ia fai ni kopi o le ata e tufa i le vasega e galulue ai.


**PESE:** Faalogo ma usitai.

**A'OA'OGA:** 1. Na manuia le faiva a le au-soo ona o le usitai iā Iesu.  
2. Ia tatou ola usiusitai.

## O LE FAIVA O LE AUSOO



## O LE FAIVA O LE AUSOO



paint the world  
**SUPER**  
**COLORING**

**ASO SA:**           **16 IUNI 2024**

**MATAUPU:**       **O LE FARESAIO MA LE AO LAFOGA**

**SINI:**              Ia malamalama le vasega, e alofa le Atua i le tagata loto maualalo.

**TUSI FAITAU:**     LUKA 18: 9 – 14   (MO FAIAOGA)  
                        LUKA 18: 13       (MO LE VASEGA)

A o le tagata ao lafoga, ua tu mamao atu, e le mafai ona tepa a'e ona mata i le lagi, a ua popo lona fatafata, ua faapea atu, "Le Alii e, ia e alofa mai ia te au le tagata agasala."

**FESOASOANI MO FAIAOGA:**

Na o a'e i le malumalu tagata e to'alua, e tatalo. O le faresaio le tasi, a o le tagata ao lafoga le isi.

O le faresaio, o le tagata sa tausia ma le faamaoni le tulafono, o ia foi o se tagata e to'aga e fai mea o le lotu faa-Iutaia e pei o taulaga, anapogi, ma le tatalo. Ae le gata i lea, sa ia taofi mau i tu ma aga faa-Iutaia. O le tagata sa maualuga i le vaai a tagata, ma alofagia, fa'aaloalo ma faaeaesa i ai tagata Iutaia.

A o le ao lafoga, o se tagata sa inosia e tagata Iutaia aua o lana galuega o le aoina o lafoga e fai e tagata uma mo le malo o Roma. O i latou foi nei sa vaai maualalo i ai tagata Iutaia aua e manatu i latou, o ao lafoga o ni tagata agasala po o tagata ua tele o latou sese i le va ma le Atua atoa ma tagata.

Sa tulai le faresaio ma tatalo i le Atua ma lona loto faamaualuga, aua e le pei o ia o isi tagata. A o le tagata ao lafoga, ua tu mamao atu, ma popo lona fatafata ma tatalo i lona loto maualalo, ina ia faamagaloina ana agasala ma ia tatalo, "Le Atua e, ia e alofa mai ia te a'u le tagata agasala."

Tamaiti, o le tatalo a le faresaio ma lona loto faamaualuga na faamaulaloina ai o ia e Iesu. A o le tatalo a le ao lafoga ma lona loto maualalo, na faamaualugaina ai o ia e le Atua.

**GALUEGA FAATINO:**   **VALIVALIGĀ ATA/FAATINO LE TALA**

Ia fai ni kopi o le ata ma tufa i le vasega e galulue ai.

**PESE:**              Fai sau tatalo i le taeao  
                        Fai sau tatalo i le ao  
                        Fai sau tatalo i le po  
                        E faafafia ai lou loto.

**A'OA'OGA:**        1.       'Aua le ola faamaualuga.  
                        2.       E alofa le Atua i le tagata loto maualalo.



## O LE FARESAIO MA LE AO LAFOGA



**ASO SA:**           **23 IUNI 2024**

**MATAUPU:**       **UA VALAAU IESU IĀ SAKAIO**

**SINI:**              Ia malamalama le vasega, na alofaina pea Sakaio e Iesu.

**TUSI FAITAU:**     LUKA 19: 1 – 10   (MO LE FAIAOGA)  
                        LUKA 19: 8       (MO LE VASEGA)

“Faauta, le Alii e, o le a ou vaeluaina atu au mea i e matitiva; afai foi ua ou ave mea a se tasi i se auala pepelo, ou te taui atu ai e taifā.”

**FESOASOANI MO FAIAOGA:**

Ua oo ane Iesu i Ieriko, ua oo ane foi ma le motu o tagata e fia faalogologo i ana a'oa'oga.. Sa i ai ma le tagata e igoa iā Sakaio, o ia o le ao lafoga. O lana galuega, o le aoina o tupe a tagata e ave mo le mālō o Roma e fai ai a latou galuega. Peitai, e lei faamaoni Sakaio i lana galuega. Ua ia ave na o se vaega o tupe, ae tuu le isi vaega mo ia. O le mafuaaga lea e inosia ai o ia e tagata.

Na faalogo loa Sakaio ua sau Iesu, tu loa i luga ma su'e se auala e feiloa'i ai iā Iesu. Ua fiu Sakaio e tau vaai Iesu, ae ua ia le iloa atu, ona o ia o se tagata puupuu ma saasaa. Ona ia a'e loa lea i le laau o le sukamoru sa tu i tafatafa ane o le auala, ma ua ia iloa atu ai Iesu. Ua oo ane Iesu ma iloa atu Sakaio i luga o le laau, ona Ia fetalai atu lea i ai, “Sakaio e, ia vave ifoifo ia i lalo, auā e tatau ona ou nofo i lou fale i le aso nei.”

Ua tu nei Sakaio ma fai atu iā Iesu, “Faauta le Alii e, o le a ou vaeluaina atu a'u mea i ē matitiva; afai foi ua ou ave mea a se tasi i se auala pepelo, ou te taui atu ai e ta'ifā.”

Tamaiti, o Sakaio o se tagata sa le faamaoni i lana galuega, ae na alofa pea i ai Iesu, auā na ia tautino iā Iesu i lona le faamaoni. O le mana'o fo'i lea o Iesu mo tatou, ina ia tatou faamaoni i galuega e valaau ai i tatou i taimi uma.

**GALUEGA FAATINO:**    **FAATINO LE TALA**

Ia faatino faatasi e faiaoga ma le vasega le tala e pei ona faamatalaina.

**PESE:**              Ua ou iloaina, ua ou iloaina  
                        Ua ou fanaufouina  
                        Ua ou iloaina, ua ou iloaina  
                        Ua soifua Iesu iā ita  
                        E i ai nisi mea ua ou le iloa  
                        O mea ua tutupu ma le lē mautinoa  
                        Ae tasi lava le mea ua ou iloaina  
                        Ua ou fanaufouina

I do, I do, I surely do know  
That I've been born again  
I do, I do, I surely do know

That Jesus lives in me  
There are some things that I don't know  
There are some things that are not true  
But this one thing I surely do know  
That I've been born again

- A'OA'OGA:**
1. Na talia e Sakaio le valaau a Iesu.
  2. Ia tatou galulue ma le faamaoni.
  3. E le faailoga tagata Iesu.



**ASO SA:**           **30 IUNI 2024**

**MATAUPU:**       **O LE MAUGA O OLIVE**

**SINI:**              Ia malamalama le vasega, na tagi Iesu ina ua Ia vaai atu i le ‘aai o Ierusalema.

**TUSI FAITAU:**     LUKA 19: 41- 44 (MO LE FAIAOGA)  
                        LUKA 19: 41     (MO LE VASEGA)

Ua latalata o ia, ua silafia e ia le aai, ona tagi ai lea o ia.

**FESOASOANI MO FAIAOGA:**

O le mauga o Olive, e tu i le itū i Sasa’e o Ierusalema. Sa faaigoaina faapea lenei mauga, ona sa tele laau o le olive sa tutupu ma ola ai. A oo atu i le tumutumu o lenei mauga, ua iloa atu ai le taatia mai o le aai o Ierusalema. Sa i ai fo’i i luga o lenei mauga le fanua e ta’ua o Ketesemane, lea na tatalo ai Iesu.

A o agai ifo Iesu ma ona soo i le mauga o Olive, na tu Iesu, ma silasila atu i le aai atoa o Ierusalema o lo o taoto mai, ona tagi ai lea o Ia.

O Ierusalema, o le aai e paia i mafaufau ma manatu o tagata Iutaia. O le aai sa tu ai le malumalu e tapua’i ai tagata Iutaia ma le talitonuga, e afio le Atua i le malumalu. Peitai, ua faasolo ina lē usitai tagata ma lē fia faalogo i le Atua.

O le mafuaaga lea na tagi ai Iesu i luga o le mauga o Olive, ona o le alofa i tagata, ina ia liua o latou loto, ma lagonaina le toe fia fo’i i le Atua.

**GALUEGA FAATINO:**    TALIGĀ FESILI

**FESILI MA TALI**

1.       O fea e tu ai le mauga o Olive?

Tali:   I le itū i sasa’e o Ierusalema.

2.       O le a le igoa o le fanua i luga o le mauga?

Tali:   O le fanua o Ketesemane.

3.       Aiseā e tāua ai le aai o Ierusalema i tagata Iutaia?

Tali:   Ona sa tu ai le malumalu, o le ogatotonu o le lotu Iutaia.

4.       Aiseā na tagi ai Iesu?

Tali:   Ona o lona alofa i tagata uma i Ierusalema.

**PESE:** Na faia e le Atua mauga maualuluga  
God made the mountains high.

**A'OA'OGA:**

1. Ua tagi Iesu i luga o le mauga o Olive.
2. E alofa Iesu i tagata uma.
3. E le fiafia Iesu i tagata le usiusitai.

## O IESU I LE MAUGA O OLIVE





## **MANATU TAIALA IULAI – SETEMA: IA LOTO ALOFA**

O le faamoemoe maualuga ina ia aoaoina le fanau ina ia maua le loto alofa i so o se tagata, e pei foi ona alofa mai le Atua ia i tatou.

**ASO SA:**           **7 IULAI 2024**

**MATAUPU:**       **UA ALOFA IONATANA IA TAVITA**

**SINI:**              Ia malamalama le vasega, e tatau ona tatou alolofa i so o se tagata.

**TUSI FAITAU:**     1 SAMUELU 19: 1 – 4 (MO LE FAIAOGA)  
                        1 SAMUELU 19: 4     (MO LE VASEGA)

Ua tautala lelei Ionatana ia Saulo lona tamā ia Tavita, ua fai atu foi o ia te ia, Aua nei agaleaga le tupu i lana auauna o Tavita, aua e lei agaleaga o ia ia te oe, a ua agalelei lava o ia ia te oe.

### **FESOASOANI MO FAIAOGA:**

O Saulo o le tupu o Isaraelu. O lona atalii o Ionatana. Sa auauna ai Tavita sa fesoasoani ma latou mafuta. O Tavita o le uo a Ionatana. A o le tupu o Saulo e lē fiafia ia te ia.

E toatele tagata sa fiafia ia Tavita. Sa tupu ai le popole o Saulo ina nei mananao tagata e avea Tavita ma tupu.

Sa taumafai Saulo e faaoo le oti ia Tavita. Sa ia faatonuina Ionatana lona atalii ma ana auauna e fasioti Tavita. E lei mana'o Ionatana i lea tonu, na ia tau ia Tavita ina ia alu e lafi ae o le a la fesootai pea.

Na fai foi Ionatana i lona tamā, aua nei ona faia lea mea. E leai se leaga o faia e Tavita. Sa talia e Saulo le fautuaga a lona atalii o Ionatana. Ua saogalemu ma lei oo lava se leaga ia Tavita.

Tamaiti e ese le lelei o Ionatana e moni lona alofa ia Tavita. E leai foi se leaga na faia e Tavita.

### **GALUEGA FAATINO:**

Faamatala tala ma fa'aaoga ata.

**PESE:**              O le uo a Tavita ma Ionatana.

Le mafutaga e, a Tavita ma Ionatana  
Aue loto e, ua nutimomoia  
Lou fatu e, ua ta'e  
Vaivai ai le tino  
O le uo moni  
O lenei o le a lilo.

- A'OA'OGA:**
1. E alofa Ionatana ia Tavita
  2. Ua talia e Saulo le fautuaga a Ionatana.
  3. Ia e alofa i so o se tagata.

## **UA ALOFA IONATANA IA TAVITA**

## IONATANA MA TAVITA



**UA ALOFA IONATANA IA TAVITA**



**ASO SA:** **14 IULAI 2024**

**MATAUPU:** **UA AGALELEI LE ATUA IA IOPU**

**SINI:** Ia malamalama le vasega, e alofa le Atua i le tagata e tumau ia te Ia.

**TUSI FAITAU:** IOPU 42: 12 – 15 (MO LE FAIAOGA)  
IOPU 42: 12 (MO LE VASEGA)

Ua sili foi ona faamanuia e le Alii o le gataaga o Iopu i lona amataga; auā sa ia te ia mamoe e sefulu afe ma afe e fa, ma kamela e ono afe, ma povi e lua afe, ma asini fafine e tasi le afe.

**FESOASOANI MO FAIAOGA:**

O le tatou mataupu i lenei taeao; O le tama o Iopu. O se tagata onosai i tiga na feagai ma ia.

O Iopu e tele faigata ma puapuaga sa oo i ai. Na feoti uma lana fanau, o ana lafu manu, o ana faatoaga ma ona fale, sa leaga uma ma aveesea. E le gata i lea sa leaga uma lona tino i se ma'i papala.

E le'i mafai e ia tiga ma faigata ona aveesea le talitonu o Iopu i le Atua. Sa tumau pea o ia i le Atua. Sa faamanuia le Atua ia Iopu. Na toe maua e ia le tele o mamoe, o kamela, o povi ma asini. Ua sili atu le tele nai lo manu na ia maua muamua. Ua ia toe maua le fanau, e toafitu tama, ma teine e toatolu.

Tamaiti, a e tumau i le Atua, e te maua pea ana faamanuiaga ma tumau pea lona alofa ma lona agalelei ia i tatou.

**GALUEGA FAATINO:** Solo (Tauloto)

Fai ni taga o le solo.


O ai le toa  
O Iopu le toa  
E tumau lona onosai  
Tusa lava po o a tiga o lona ma'i  
Le feoti o si ana fanau  
Le tamaoaiga ua maimau  
Tumau lona talitonu  
Na o le Atua le amiotonu.

**A'OA'OGA:** 1. E alofa le Atua ia Iona  
2. E lelei le ola onosai.

## O LE TOEAINA O IOPU



## O LE TOEAINA O IOPU



**ASO SA:**           **21 IULAI 2024**

**MATAUPU:**       **UA FAAMALOLO E IESU TAGATA MAMA'I**

**SINI:**              Ia malamalama le vasega, e alofa Iesu i tagata uma.

**TUSI FAITAU:**     MATAIO 15: 29 – 30 (MO LE FAIAOGA)  
                        MATAIO 15: 30       (MO LE VASEGA)

Ona o mai ai lea ia te ia le motu o tagata e toatele, ua ia te i latou o e pipili, o e mumutu, o e tauaso, o e gugu, atoa ma nisi e toatele, ua latou tuu atu ia i latou i vae o Iesu; ona faamalolo ai lea e ia o i latou.

**FESOASOANI MO FAIAOGA:**

O lo o feoai pea Iesu ma ona so'o mai i lea nuu i lea nuu. Ua oo ane i latou e lata i le vai o Kalilaia. Ua alu ane i le mauga ua nofo i lalo ma malolo ai.

Ua o mai ia te Ia le motu o tagata e to'atele. O lo o i ai faatasi tagata mama'i, o e pipili, o e mumutu (o tagata e mumutu o latou vae po o lima, (ua le atoatoa nisi vaega o latou tino) o e tauaso, o e gugu, atoa ma nisi e toatele. Ua latou tuu atu ia i latou i vae o Iesu, ona faamalolo ai lea e Ia o i latou.

Tamaiti e mautinoa le fiafia o nei tagata mama'i. Ua vave ona atoatoa lo latou malosi ma toe foi fiafia i o latou aiga.


**GALUEGA FAATINO:** Valivaligā Ata

Saunia ata, peni vali. Tufa i tamaiti e galulue ai.

- PESE:**
1.     O mata e vaai, taliga e faalogo  
Meaalofa a le Atua mo a'u ma oe  
O mata e vaai, taliga e faalogo  
Meaalofa a le Atua mo au ma oe
  
  2.     O lima galue ma vae momoe  
Meaalofa a le Atua mo au ma oe  
O lima ma vae na ia aumaia  
Fesoasoani i le aso atoa.

- A'OA'OGA:**
1.     E leai se mea e faigata i le Atua.
  2.     E mafai e Iesu ona faamalolo ma'i uma.

## UA FAAMALOLO E IESU TAGATA MAMA'I



paint the world  
**SUPER**  
COLORING

## UA FAAMALOLO E IESU MA TAGATA MAMA'I



**ASO SA:**           **28 IULAI 2024**

**MATAUPU:**       **UA FAFAGA E IESU LE MOTU O TAGATA**

**SINI:**              Ia malamalama le vasega, e silafia e Iesu o tatou manaoga uma.

**TUSI FAITAU:**     MAREKO 8: 1 – 6 (MO LE FAIAOGA)  
                        MAREKO 8: 6       (MO LE VASEGA)

Ona fetalai atu lea o ia, i le motu o tagata ia latou taooto i lalo; ona tago lea o ia i areto e fitu, ua faafetai ua tofitofi, ma avane i ona so'o, latou te laulauina atu ona latou laulauina atu ai lea i le motu o tagata.

**FESOASOANI MO FAIAOGA:**

Tamaiti, o lo o toatele pea tagata o lo o ane ia Iesu. Ua latou fiafia e mafuta ma talanoa ma Ia. E le gata i lea ae sa faamalolo e Iesu o latou ma'i.

Ua tolu aso o latou mafuta, ua silafia e Iesu ua fia aai i latou. Ua le iloa foi e ona so'o, po o fea a aumai ai ni areto.

Ua fesili atu Iesu i ona so'o, pe fia ni areto o ia i latou. Ona tali mai lea o i latou e fitu areto.. Ua taooto i lalo le motu o tagata. Ua tago Iesu i areto e fitu, ua ia faafetai, ona tofitofi ai lea e ia o areto ma avatu i ona so'o latou te laulauina atu i le motu o tagata. Ua le gata ina faamalolo i o latou ma'i eseese, a ua fafaga foi i latou, ua aai ma ua maoona.

E lei faatamala Iesu i le latou mafutaga. Ua Ia faamalolo ma fafaga ia i latou.

**GALUEGA FAATINO:**   **FAATINO LE TALA**

Ia faatino le tala e faiaoga ma le vasega.

**PESE:**              Lo'u Atua e, ua ou fia ai ia e fafaga ia te a'u.

**A'OA'OGA:**        1.       E mafai e Iesu ona fafaga le motu o tagata i areto e 7.  
                        2.       E mafai e Iesu ona faamalolo so o se ma'i.

**ASO SA:**           **4 AOKUSO 2024**

**MATAUPU:**       **O LE TATALO A LE ALII**

**SINI:**              Ia malamalama le vasega, e tatau ona toaaga e tatalo, tauloto le tatalo a le Alii.

**TUSI FAITAU:**     MATAIO 6: 9 – 13 (MO LE FAIAOGA)  
                        MATAIO 6: 9 – 13 (MO LE VASEGA)

Tauloto le Tatalo a le Alii e tamaiti uma.

**FESOASOANI MO FAIAOGA:**

O lo o faasolosolo pea a'oa'oga ma galuega a Iesu ma ona so'o. Ua oo i latou i le mauga, ona ia a'oa'o atu lea i le motu o tagata le tatalo a le Alii, o le tatalo lea na a'oa'o e Iesu i lona auso'o.

O le tatalo o le auala lea tatou te fesootai ai i le Atua. Tatou te faafetai ai i lona alofa ma lana tausiga ia i tatou i lea aso ma lea aso, tatou te faatoese foi i o tatou sese ina ia faamagalo i tatou. E fai lau tatalo pe a e ai, pe a e moe, ia ma le taimi e te ala ai.

O Ia foi e aumai ai le manuia, malosi ma mea lelei uma lava mo i tatou. A tatou tatalo, e moeiini mata, piilima ma filemu. E tatau ona tatalo ma mafaufau i le Atua. Ia tatalo ma le loto atoa, ia iloa e le Atua, ua na o Ia lo tatou fesoasoani.

Tamaiti, e tatau ona tatou ola tatalo, e manuia ai o tatou olaga.

**GALUEGA FAATINO:** Matamatagā Ata:

- 1) Ia saunia ni ata o ni tagata o lo o tatalo (Ata talafeagai mo le mataupu).
- 2) Faamanatu foi i tamaiti ia filemu, moeiini ma faalogo lelei i le tatalo o lo o faia i le taimi o le lotu.
- 3) Tauloto/A'oa'o le tatalo a le Alii – Lo matou Tama e, o i le lagi.....

**PESE:**              Faitau le Tusi Paia  
                        Ma tatalo i aso uma  
                        Tatalo i aso uma x 2

Read your Bible  
And pray everyday  
Pray everyday x 2

**A'OA'OGA:**        1.     E tatau ona tatou iloa tatalo.  
                        2.     Ia toaga e tatalo

## O LE TATALO A LE ALII



# O LE TEINE TATALO

Coloring Page



## O TAMAITI E FIAFIA E TATALO



**ASO SA:**           **11 AOKUSO 2024**

**MATAUPU:**       **IOPU LE TAMĀ AMIOTONU (ASO SA O TAMĀ)**

**SINI:**              Ia malamalama le vasega, e tatau ona amiontu i luma o le Atua.

**TUSI FAITAU:**     IOPU 1: 1 – 5   (MO LE FAIAOGA)  
                        IOPU 1: 1       (MO LE VASEGA)

Sa i le nuu o Usa le tasi tagata, o lona igoa o Iopu, na sao le amio a lea tagata ma le amiontu, sa mata'u foi o ia i le Atua ma 'alo'alo ese i mea leaga.

**FESOASOANI MO FAIAOGA:**

O le tatou mataupu i lenei Aso Sa – “O Iopu le tamā amiontu.” O le a le mea lea e faataua i lenei Aso Sa? Ioe, o le Aso Sa o tamā. Ia e tatau ona fai se meaaalofa mo tamā, ia usitai ma alofa ia tamā.

O Iopu e fiafia i le lotu. O se tagata faitaulaga, e toaga e tatalo ma faafetai i le Atua i mea ua ia maua. O Iopu o se tamā amiontu, ma sao lana amio i luma o le Atua. Sa alofa lava le Atua i lana auaua o Iopu, auā o ia o se taitai lelei.

Tamaiti, e faapena foi o tatou tamā. E fiafia e fai lotu ma tatalo ia manuia le fanau ma le aiga. Ia a e vaai atu i se Aso Sa e le lotu lou tamā, ia fai i ai, tamā (dad), se tatou o i le lotu. Tatou te o mai lava fai le meaai pe a uma le lotu. O le aiga lelei e fiafia ma toaga e fai lotu i le Atua.

**Uiga o Upu:**

- |                       |   |   |
|-----------------------|---|---|
| i)           amiontu  | - | amio lelei, amio mama, fiafia e tatalo i le Atua. |
| ii)          'alo'alo | - | alu ese mai le leaga.                             |

**GALUEGA FAATINO:**   **MATAMATAGĀ ATA/TALIGĀ FESILI**

Fai ni kopi o le ata ua avatu i le mataupu. Tufa e matamata ai tamaiti ma ave ma latou.

Fesili:

1.       O ai le igoa o le toeaina o lo o ta'ua i le tala?  
Tali:   O Iopu

2.       O se tamā lelei Iopu po o se tama leaga?  
Tali:   O le tamā lelei.

**PESE:**              Ta'u i lou tamā o Iesu e lelei o Ia x 2  
                          Tuli tuli Satani  
                          Tuli tuli mamao  
                          Ta'u i lou tamā o Iesu e lelei o Ia.

**A'OA'OGA:**

1. O Iopu o se tamā lelei.
2. E alofa Iesu ia tamā

**IOPU LE TAMĀ AMIOTONU**

Restoration Coloring Page



Peter's Denial Lesson 3 of 3 Superbook Academy

©2017 The Christian Broadcasting Network, Inc. Superbook® and the Superbook logo are registered trademarks of The Christian Broadcasting Network, Inc.  
The characters in Superbook including Joy, Chris and Geron are trademarks of The Christian Broadcasting Network, Inc. All rights reserved.

**ASO SA:**           **18 AOKUSO 2024**

**MATAUPU:**       **UA FAAMALOLO E IESU LE TAGATA TAUASO**

**SINI:**              Ia malamalama le vaega, o le palapala na toe fa'aaogaina e Iesu e faapupula ai le tauaso.

**TUSI FAITAU:**     IOANE 9: 1 – 7   (MO LE FAIAOGA)  
                        IOANE 9: 6 – 7   (MO LE VASEGA)

Ua fetalai atu nei upu, ona feanu ifo lea o ia i le eleele, ona faia lea o le palapala i le feanuga, ua nini mata o le tauaso i le palapala, ona faapea atu lea o ia ia te ia “Alu ia, ina mulumulu .....

#### **FESOASOANI MO FAIAOGA:**

Sa i ai Iesu ma ona soo i totonu o le malumalu. E ulufafo mai o Ia, ma vaaia ai se tagata tauaso. O le tagata lea na fanau mai lava o tauaso. Sa fesili foi ona soo ia Iesu, po o ai e agasala, po o ia, po o ona matua. Na tali Iesu, e leai, ae ina ia fa'aalia galuega mamana a le Atua.

Ua feanu Iesu i le palapala, ua ia tago ma ua nini ai mata o le tauaso. Ona ia faatonuina ai lea o le tauaso e alu e mulumulu i le vai i Seloa.

Ua faapea ona fai e ia, ma ua pupula ai ona mata. Ua foi o ia, ua vaaia e tagata ua pupula le tauaso. Sa latou tuu fesili po o ia moni lea, ae ua ia tali atu, “O a'u lava lenei”

Tamaiti e ofoofogia galuega a Iesu. Ua fa'aaoga e Iesu le palapala e nini ai mata o le tauaso. Ua alu foi ma ua mulumulu i le vai o Seloa, ona pupula ai lea o ona mata. Tamaiti, e silisili ese le Atua.


#### **GALUEGA FAATINO:    FAATINO LE TALA**

Ia faatino e le Faatino le tala: Fa'aaoga tamaiti ma se faiaoga.

**PESE:**              O mata e vaai  
                        Taliga e faalogo  
                        Meaalofa a le Atua  
                        Mo au ma oe  
                        O mata taliga na Ia aumaia  
                        E fesoasoani i le aso atoa

**A'OA'OGA:**        1.     E mafaia mea uma e Iesu.  
                        2.     Ua pupula mata o le tauaso.

## **UA FAAMALOLO E IESU LE TAUASO**



## UA FAAMALOLO E IESU LE TAUASO



**ASO SA:**           **25 AOKUSO 2024**

**MATAUPU:**       **UA FUFULU E IESU VAE O ONA SO’O**

**SINI:**              Ia malamalama le vasega, e auauna Iesu i tagata uma.

**TUSI FAITAU:**     IOANE 13: 1 – 5 (MO LE FAIAOGA)  
                        IOANE 13: 5       (MO LE VASEGA)

Ona liligi lea e ia o le vai i le ipu e mulumulu ai, ua mulumulu i vae o ona so’o, ma soloi ai i le solo ua ia fusi ai.

**FESOASOANI MO FAIAOGA:**

A o mafuta pea Iesu ma ona so’o, sa ia faailoa ia i latou, e i ai le taimi e alu ese ai o Ia.

A o faia le tausamiga, ua tula’i Iesu, ua liligi le vai i totonu o le apa, ua i ai ma le solo. Ua ia fufulu ai vae o ona soo. Ua ia tatala foi le fusi sa Ia fusi ai, ma solo ai o latou vae.

Tamaiti, sa faateia le au soo, sa le talia foi e se tasi o le au soo. Peitai, sa faatino pea le galuega a Iesu. Ua a’oa’o mai i lenei mataupu, o i tatou o auauna. Ia e faia feau mo so o se tagata o manaomia lau fesoasoani.

**GALUEGA FAATINO:**   Faamatala le tala ma fa’aali Ata.

Fai ni kopi o ata o lo o saunia atu.

Fa’aaoga Ata i le taimi o lo o faamatala ai le mataupu, ia malamalama atili ai tamaiti.


**GALUEGA FAATINO:**

Solo (A’oa’o le solo ma fai ni taga)

O Iesu o le tatou Faaola  
Na maliu ma toe ola  
O Ia o se auauna faamaoni  
E lei afaina ia te Ia sona tofi.

**A’OA’OGA:**       1.       E mana’o Iesu ia tatou ola auauna.  
                        2.       E manua le tagata e auauna faamaoni.

## UA FUFULU E IESU VAE O ONA SOO





## UA FUFULU E IESU VAE O ONA SO’O



**ASO SA:**           **1 SETEMA 2024**

**MATAUPU:**       **UA VALAAU LE ATUA IA SAMUELU**

**SINI:**              Ia malamalama le vasega, e silafia e le Atua mea uma.

**TUSI FAITAU:**     1 SAMUELU 3: 1 – 14 (MO LE FAIAOGA)  
                        1 SAMUELU 3: 10     (MO LE VASEGA)

Ua afio mai le Alii, ona tu lea ma valaau, pei ona fai, Samuelu e, Samuelu e! ona tali atu lea o Samuelu, Fetalai mai ia, auā o lo o faalogologo atu lau auauna.

**FESOASOANI MO FAIAOGA:**

O Samuelu sa auauna (fesoasoani) ia Eli i le malumalu (falesa). O Eli o le ositaulaga (faifeau). E nofo i le falesa e tapena ma saunia mea uma e moomia mo le taulaga i le Atua. O Samuelu la sa fesoasoani i ai.

Ua oo i le isi po. Ua moe Samuelu, ae ia faalogoina se leo o valaau mai ia te ia. Sa faapea a ia, o le leo o Eli, ae peitai, sa ia alu atu i ai, e leai. E faatolu ona valaau mai le leo ia te ia.

Ua fai atu Eli, e alu e taoto. A toe valaau mai, ona ia tali lea i ai, Fetalai mai ia le Alii e, auā o lo o faalogologo atu lau auauna.

Tamaiti sa faailoa e le Atua ia Samuelu, na te tau ia Eli, o le faasalaga o le a oo ia te ia ma lona aiga.

Sa silafia e le Atua le lē faamaoni o Eli ma lana fanau. Ua le faatonuina e Eli lana fanau i le lē faamaoni. O lea, sa le toe ositaulaga ai Eli ma lona aiga.

Sa faamaoni pea Samuelu ma filifilia o ia e fai ma perofeta (faifeau). E manuia le tagata faamaoni i le Atua.

**GALUEGA FAATINO:**   Matamatagā Ata

Fai ni kopi o ata e fa'aaoga e faamatala ai le tala.

**PESE:**              1.     Samuelu, Samuelu  
                          O le tama faamaoni  
                          Tu i luga faamalosi  
                          'Aua le fefe  
                          Ia e loto tele  
                          O lo o soifua le Atua  
                          E manuia ai lau tautua. (fati: MP x 2 malosi malosi...)

**A'OA'OGA:**       1.     E manuia le tagata faamaoni.  
                         2.     Galue ma faamoemoe i le Atua.



## UA VALAAU LE ATUA IA SAMUELU



Samuel was called by God and served in the temple from childhood. He was the last of the Judges.

**ASO SA:**           **8 SETEMA 2023**

**MATAUPU:**       **O TAVITA LE FAIPESE**

**SINI:**              Ia malamalama le vasega, na alu ese le ma'i o Saulo ina ua ta le kitara a Tavita.

**TUSI FAITAU:**     1 SAMUELU 16: 14 – 23 (MO LE FAIAOGA)  
                        1 SAMUELU 16: 23                    (MO LE VASEGA)

A oo mai le agaga mai le Atua ia Saulo, ona tago ai lea o Tavita i le kitara, ua ta i lona lima, ona mapu ai lea o Saulo, ua lelei ai o ia, ua alu ese ai le agaga leaga ia te ia.

**FESOASOANI MO FAIAOGA:**

Tamaiti o le tatou mataupu i lenei taeao – “O Tavita le Faipese.”

O Saulo o le tupu muamua lea o Israelu. Sa oo ina i ai se faafitauli, ona ua le atoatoa lona malosi. Ua ia lagonaina se isi malosi ua afaina ai lona fiafia ma lona to'a filemu.

Sa faailoa e Saulo i ana auauna, e tatau ona saili mai se tasi e poto e ta kitara. O le fofo lea o lona mai, a ta le kitara, ona malosi ai lea. Ona latou ta'ua lea i ai, o le taulealea e igoa ia Tavita, e poto e ta kitara.

Ua malie i ai Saulo, ona sau ai lea o Tavita. Sa faapea ona fai. A oo ina mafatia Saulo i lona ma'i, ona ta lea e Tavita le kitara, ma alu ese ai le ma'i.

Tamaiti, a finagalo le Atua e aveese le ma'i pe a ta le kitara, e mafaia lava. O a lava auala e finagalo ai le Atua e oo mai ai lana faamalologa, e manuia lava o tatou ma'i.

**GALUEGA FAATINO:** Matamatagā Ata

Fai ni kopi o ata ua saunia atu, e fa'aaoga i le taimi e faamatala ai le mataupu.

Fa'aaoga se kitara//ukulele e ta ai pese Aoga Aso Sa e/pepese ma fiafia ai tamaiti.

**A'OA'OGA:**        1.     E leai se mea e faigata i le Atua.  
                        2.     A fiafia, e lagona le malosi/fiafia.

## O TAVITA LE FAIPESE



**ASO SA:**           **15 SETEMA 2024**

**MATAUPU:**       **O LE TAMA LOTO FOA'I**

**SINI:**              Ia malamalama le vasega e mafai mea uma e Iesu.

**TUSI FAITAU:**     IOANE 6: 1 – 13 (mo le FAIAOGA)  
                        IOANE 6: 9        (mo le VASEGA)

“O lo o iinei le tama o ia te ia areto karite e lima, ma nai i'a iti e lua lau, a e aumā ea ia mea ia i latou e toatele?”

**FESOASOANI MO FAIAOGA:**

O lo o feoai lava Iesu ma ona so'o. Ua oo atu i latou i le vai lea o Tiperia. Ua mulimuli atu pea tagata e toatele ia i latou, auā ua latou vaaia le tele o tagata mama'i ua malolosi i faamalologa a Iesu.

E tatau foi onafafaga nai tagata. Ona fai atu lea o Iesu ia Filipo (o se tasi o ona so'o) Po'o ifea e maua mai ai ni areto. Na iloa e so'o o Iesu e le lava se latou tupe e faatau ai ni areto e lava ai le motu o tagata.

Peitai, sa faailoa ane le tasi so'o o Aneterea, o lo o i ai se tama o lo o i ai ni areto karite e lima, ma nai i'a iti e lua lau. Ua latou avane ia Iesu. Ua taooto foi tagata. Ua tago Iesu i areto ma i'a, ua ia faafetai, ona tufatufa lea i tagata e ona soo.

Ua maoona i latou. Ua latou faapotopoto i toeiga nei maumau. Ua tutumu ai ato e sefulu lua mai areto e lima, ma i'a e lua lau.

O le loto foai o lenei tamaitiiti, na aai ai le motu o tagata, ina ua faia i ai e Iesu le vavega

**Uiga o Upu:**

- |      |              |   |           |
|------|--------------|---|-----------|
| i)   | areto karite | - | falaaoa   |
| ii)  | lua lau      | - | lua i'a   |
| iii) | aumā         | - | e lē lava |

**GALUEGA FAATINO:**   **Matamatagā Ata**

- i)      Fai ni kopi o ata ua saunia atu
- ii)     Tufa mo tamaiti, faamatala le mataupu ma matamata ai.

**PESE:**            O le alofa o se mea, e te faasoa atu/Love is something that you give it away x 3

**A'OA'OGA:**        1.     E alofa Iesu i tagata uma.  
                        2.     Na fesoasoani Iesu i tagata i taimi uma.

# **O LE TAMA LOTO FOA'I**



**ASO SA:**           **22 SETEMA 2024**

**MATAUPU:**       **O IOSEFA LE ATALII O IAKOPO**

**SINI:**              Ia malamalama tamaiti, e alofa Iakopo ia Iosefa nai lo ona uso uma

**TUSI FAITAU:**     KENESE 37 : 2 – 4 (MO LE FAIAOGA)  
                        KENESE 37 : 4       (MO LE VASEGA)

“Ua iloa e ona uso ua sili le alofa o lo latou tama ia te ia ae laititi i ona uso uma, ona latou inoino ai lea ia te ia, ma ua le mafai ona tautala ma le filemu ia te ia”

**FESOASOANI MO FAIAOGA:**

Tamaiti, o le tatou Tusi na faitau ananei, e faatatau i le toeaina o Iakopo ma ona atalii.

Ina ua matutua tama, ma ua latou iloa, e faapito le alofa o lo latou tama i lo latou uso laititi. Ona tupu lea o le ita i loto o tama, ma latou taumafai e fafau se auala ina ia aveese mai ai Iosefa ma i latou.

A o Iakopo, sa sili lona alofa ia Iosefa ona sa fanau o ia ina ua toeaina Iakopo. E sili foi lona atamai nai lo o ona uso. Na faia e Iakopo se ofu talaloa felanulanua'i mo lona atalii o Iosefa. O Iosefa, o le lona 11 lea o fanau a Iakopo i lana fanau e toa sefulu ma le lua.

Tamaiti, o Iosefa o se atalii lelei ma usita'i lona tama. Ia faapena foi tatou, ia tatou alolofa ma usiusitai i o tatou matua.


**GALUEGA FAATINO:**   Valivaligā ata

Ia fai ni kopi o le ata ua saunia e tufa i tamaiti e galulue ai.

**PESE:**              Iesu e alofa i tamaiti (Jesus loves the little children)

**A'OA'OGA:**        1.     Ia alofa i so o se tagata  
                        2.     E alofa Iesu i tagata uma

**GALUEGA FAATINO:** la fa'aaoga lanu ua avatu e valivali ai le ata ua saunia



## IOSEFA LE ATALII O IAKOPO



**ASO SA:**           **29 SETEMA 2024**

**MATAUPU:**       **O LE SAMARIA AGALELEI**

**SINI:**              Ia malamalama le vasega, e tatau ona agalelei soo se tagata

**TUSI FAITAU:**     LUKA 10: 29 – **37** (MO LE FAIAOGA)  
                        LUKA 10: 33       (MO LE FAIAOGA)

“A o le tasi tagata Samaria ua alu lana malaga, ua oo atu i le mea o i ai o ia, ua iloa o ia, ona mutimutivale lea o lona alofa”

**FESOASOANI MO FAIAOGA:**

Ia amata lau vasega i le fesili, po o le a le uiga o le upu “AGALELEI.” Lelei tele. O le loto fesoasoani, po o le agaalofa i se tagata ua lavea, po o se tagata o lo o manaomia se fesoasoani.

O le tatou tala i le taeao lenei tamaiti, e faatatau i le galuega alofa ma le agalelei na faia e le tagata Samaria. Sa i ai le tasi tagata na alu ifo mai Ierusalem i Ieriko, peitai, na fasi e tagata fao mea (gaoi) ma ave’ese mea na ia te ia. Ua tuua o ia i le ala ma ona manua (lavea). Ona alu ane lea o le fataaulaga ma ua ui ane i le isi itu. E faapena foi i le sā Levī, na ona matamata i le tagata o lo o lavea, ma toe fa’aaaua lana malaga. Ona alu ifo lea o le tagata Samaria, ma vaai atu ia te ia, ona tupu lea o lona alofa i le tagata ua lavea. Ua na fusifusi (noanoa) i ona manu’ā, ma na ia ave i le fale talimalo.

Tamaiti, na ofoina atu foi e le tagata Samaria le tupe i le pule o le fale talimalo, ina ia lelei le tausiaina o le tagata ua lavea. O lona uiga, ia tatou faapena foi. Ia alolofa ma agalelei i soo se tasi o lo o manaomia le fesoasoani i soo se auala tatau.


**GALUEGA FAATINO:**   Faatino le tala / Valivaligā ata

Faamolemole lau susuga le faiaoga, ia faatino faaatosi ma le vasega le tatou tala e pei ona faamatalaina.

**PESE:**              Alofa i ou tuaoi

**A’OA’OGA:**        1.     Alofa i soo se tagata ua ma’i  
                        2.    Ia loto fesoasoani i soo se tasi

## SAMARIA AGALEI



## SAMARIA UA AVE LE TAGATA NA LAVEA



## **MANATU TAIALA O OKETOPA – TESEMA: IA FIAFIA LE LALOLAGI UMA**

A o tatou agai atu i le faaiuga o lenei tausaga ua fai le manatu taiala o le 3 masina mulimuli, ina ia tapenapena agai i ai mataupu aua le sauni ai o le au Kerisiano, e faamanatuina ai le Aso na Soifua ai Iesu i le lalolagi. Ia tapena ma le fiafia tagata uma i le taliaina o le pepe o Iesu Keriso na fai ma Faola mo tatou tagata agasala.

**ASO SA: 27 OKETOPA 2024**

**MATAUPU: UA FAAOLAINA E IESU LE TAGATA OTI**

**SINI:** Ia malamalama le vasega, o le mana o Iesu, na toe ola ai le tagata na oti

**TUSI FAITAU:** LUKA 7: 11 – 17 (MO LE FAIAOGA)  
LUKA 7: 14 (MO LE VASEGA)

“Ua maliu ane o Ia ua pa’i atu i le fata, ona tutu mai lea o le au fata, ona fetalai atu lea o Ia, “Le taule’ale’ a e, ou te faiatu ia te oe, Ina tula’i ia”

### **FESAOSOANI MO LE FAIAOGA:**

Ina ua oo atu Iesu ma ona soo ma le motu o tagata i le tasi nuu o Naina le igoa, ma ua latalata atu i le faitotoa o le aai, faauta foi, ua o mai tagata o lo o fata mai le tagata ua oti. Tamaiti, o le tagata lea ua oti, o le tama e toatasi a le fafine ua oti foi lana tane (toalua). Ua silasila atu Iesu i le tagata oti ma lona tina o lo o tagi ai, ona mutimutivale ai lea o lona alofa. Ua ia alu atu ma fai atu i le tina, e ‘aua le tagi. Ona pa’i atu lea o Ia i le fata ma faapea atu, “*Le taule’ale’ a e, ou te fai atu ia te oe, Ina tula’i ia.*” Ona nofo a’ e lea o ia i luga, ma tuu atu e Iesu i lona tina.

Tamaiti, ua tatou vaai la i le mamana o fetalaiga a Iesu. Na ona Ia fetalai atu lava i le tagata ua oti, ona toe ola ai lea o ia.

**GALUEGA FAATINO:** Matamatagā ata

Faamolemole susuga i faiaoga, ia fa’ali ata ua saunia i tamaiti. Manaia foi ae faaali ma toe faamatala atili ai le tatou tala mo le fanau.

**PESE:** Cast your burden (Mafatiaga ave uma ia Iesu)

**A’OA’OGA:** 1. E faia e Iesu vavega i lo tatou ola  
2. E mamana fetalaiga a Iesu  
3. E alofa Iesu i soo se tagata

## O LE TAGATA OTI O LOO FATA MAI



## UA TOE OLA LE TAGATA NA OTI



**ASO SA:**           **3 NOVEMA 2024**

**MATAUPU:**       **UA AVEA ESEKIA MA TUPU I IUTA**

**SINI:**              Ia malamalama le vasega, o Esekia le tupu amiotonu.

**TUSI FAITAU**       2 TUPU 18: 1 – 3 (MO LE FAIAOGA)  
                        2 TUPU 18: 1b   (MO LE FAIAOGA)

“.....na fai ai ma tupu Esekia le atalii o Aasa le tupu o Iuta”

**FESOASOANI MO FAIAOGA:**

O Esekia, o le atalii o le toeaina e igoa ia Aasa. O lona tina e igoa ia Avi, o le afafine o Sakaria. I le luasefulu ma le lima (25) o ona tausaga, na avea ai o ia ma tupu. Oka se laititi o lenei tama a ua fai ma tupu, a ea? Tou te iloa la outou, fai mai o se tupu foi e tulaga ese lona tulai mai. Ua ia faia le amiotounu, ma e faamoemoe i le Atua e fesoasoani ia te ia.

E tele lava mea lelei ma mea mananaia na faia e Esekia i le taimi o lona nofoaiga, aua sa ola o ia I le amoitonu a le Atua. O le mea mautinoa, o lona talitonu ma faamoemoe i le Atua,. na manuia ai mea uma na ia faia.

Tamaiti, e faapena foi i tatou. Ia tatou faia mea lelei, e fafia mai ai Iesu ia i tatou. Ia tatou tatalo foi i le Atua, e fesoasoani mai i le aoga, e faapena foi i le faiga o a tatou feau

**GALUEGA FAATINO:** Valivaligā ata

Faamolemole susuga i faiaoga ia faia ni kopi o ata ua saunia ma tufa i le fanau e valivali.


**PESE:**              Le alofa o le Atua

**A'OA'OGA:**        1.     Faamaoni i soo se mea tatou te faia  
                        2.     E fa'aaoga tatou e le Atua i soo se galuega

## O ESEKIA LE TUPU O IUTA



## UA FIAFIA ESEKIA LE TUPU



**ASO SA:** **10 NOVEMA 2024**

**MATAUPU** **O SAMASONI LE TAMA MALOSI**

**SINI** Ia malamalama le vasega, i le matautia o le malosi o Samasoni.

**TUSI FAITAU** FAAMASINO 14: 5 – 7 (MO LE FAIAOGA)  
FAAMASINO 14: 6a (MO LE VASEGA)

“Ona osofia lea o ia e le Agaga o le Alii, ua na saeia le leona, e pei ona saeia se tamai ‘oti, ae leai lava se mea i lona lima.....”

**FESOASOANI MO FAIAOGA**

O Samasoni, o lona tama o Manoa. A o o ifo Samasoni ma ona matua i le tasi nuu o Timenata, ma ua oo atu i le mea o i ai tovine a lea nuu, faauta, ua tu mai ai le leona taanoa (leona ua telē), ma ua tagi mai ia te ia. E lei faapea na fefe ai Samasoni, ae ua osofia o ia e le Agaga o le Alii, ona ia fasi lea i le leona e pei ona fasi le tama’i ‘oti.

Tamaiti, o le malosi tele o Samasoni, na ia fasi ma saeia ai lenei manu fea’i, ae leai se mea na i lona lima na leaga. Ia tatou faamoemoe i le Atua, ona mafaia ai lea soo se mea lava e faalavelave mai ia i tatou.

**GALUEGA FAATINO:** Valivaligā Ata

Faamolemole faiaoga ia tufa ata ua tapenaina i le fanau e galulue ai.

**SOLO:** Faamolemole faiaoga ia a’oa’oina le tatou solo ua tapenaina, ma fai ma ni taga mo le fanau.

O a’u lenei o Samasoni  
O le toa malosi  
Faamaoni loto tele  
Malosi ma tulaga ese  
Samasoni e malosi  
Le Atua na ia totofi  
Faamasino I le nuu  
Malosi mai lona lauulu

**A’OA’OGA:** 1. Faamoemoe i le Atua  
2. E aumai e le Atua le malosi sili

## SAMASONI LE TAMA MALOSI



## UA FASIA E SAMASONI LE LÉONA



SUPER  
COLOR

**ASO SA:** **17 NOVEMA 2024**

**MATAUPU** **UA TOE FAATASI IOSEFA MA LONA AIGA**

**SINI** Ia malamalama le vasega, o le alofa moni o Iosefa i lona tama ma lona aiga na ia aumai ai i latou i Aikupito.

**TUSI FAITAU** KENESE 47: 1 – 12 (MO LE FAIAOGA)  
KENESE 47: 12 (MO LE VASEGA)

“Ua fagaina foi e Iosefa lona tama, ma ona uso, ma le aiga atoa uma o lona tama i le mea e ai ua oo lava i o latou tama iti”

### **FESOASOANI MO FAIAOGA**

O le mataupu o lenei taeao, o le faataunuina o le mana’o o Iosefa, ina ia aumai lona tama o Iakopo ma lona aiga i Aikupito i le mea o lo o ona nofo ai.

O le manao o Iosefa, ia vave ona aumai lona tama ma lona aiga i Aikupito, ina ia faaolaina ma laveaina mai i latou i tausaga o le oge o lo o totoe i Kanana. Ua taunuu le manao o Iosefa, ma na alofagia e le tupu o Farao lona manao. E tele lava mea na ofoina e le tupu mo le aiga o Iosefa. Ua ia poloai foi, ia fai mo i latou se nuu e lelei o Kosena.

Tamaiti, o le alofa moni o Iosefa, na talosaga ai i le tupu ina ia aumai lona tama ma lona aiga latou te aumau faatasi i Aikupito.

**GALUEGA FAATINO:** Valivaligā Ata

Faaamolemole ia fai ni kopi o ata ua saunia e tufa i tamaiti e galulue ai.

**PESE** (youtube: We are one big family)

We are one big happy family  
God’s family x2  
We are one big family  
God’s family are we  
He is my brother  
She is my sister  
Our Father in Heaven  
Who loves you and me

**A’OA’OGA:** 1. Ia alolofa moni i tatou matua  
2. O le alofa o le Atua e faaolaina ai i tatou

## UA TOE FAATASI IOSEFA MA LONA AIGA



## IOSEFA MA LONA AIGA



**ASO SA:**           **24 NOVEMA 2024**

**MATAUPU:**       **UA FAAMALOLOINA LE LEPELA E IESU**

**SINI:**              Ia malamalama le vasega, na malolo le lepela ina ua pa'i i ai aao o Iesu.

**TUSI FAITAU:**     MATAIO 8: 1 – 4 (MO LE FAIAOGA)  
                          MATAIO 8: 3      (MO LE VASEGA)

“Ona a’apa atu lea o Iesu o lona aao, ua pa’i atu ia te ia, ua faapea atu “Ou te loto i ai; ina mama ia oe” ona mama loa lea o lona lepela”

**FESOASOANI MO FAIAOGA:**

O ai lou fa’ola tamaiti? Ioe, sa’o lelei. O Iesu. O Iesu na faaola i tatou mai i a tatou agasala, ma o ia foi o lo tatou uo. E le gata i lena, ae e fesoasoani ma faamalolo i tagata ua mamai. Tamaiti, o le lepela, o le mai e papala, ma e faigata ona maua se togafitiga.

A o i ai Iesu o lo o a’oa’o atu i tagata, ae ua alu ane ia te Ia le tagata lepela, ma ifo atu ia te Ia, ma fai atu ia Iesu, “A e finagalo i ai, e te mafaia lava ona faamama mai ia te au.” Ona aapa atu lea o le aao o Iesu, ma pa’i atu ia te ia ma faapea atu, “Ou te loto i ai, ina mama ia oe.” Ona mama loa lea o le lepela.

Tamaiti, ese le matautia o le fetalaiga a Iesu. Po o le a lava le mea e finagalo i ai, e mafai lava ona fai. Na mautinoa foi e le lepela, e malolo lona ma’i ia Iesu.

**GALUEGA FAATINO:**   Faatino le tala

Lau susuga i le faiaoga, ia faatino faatasi ma le fanau le tatou tala ina ia malamalama atili ai. . .

**PESE:**              I’m in the Lord’s army (youtube tune)

I may never march in the infantry  
Ride in the cavalry, shoot the artillery  
I may never shoot for the enemy  
But I’m in the Lord’s army

Im in the Lord’s army  
Yes sir!

**A’OA’OGA:**        1.      O Iesu le fomai sili  
                          2.      Ua faamama e Iesu le ma’i lepela

## **IESU MA LE TAGATA LEPELA**



## UA FAAMALOLO E IESU LE TAGATA LEPELA

YEEDELEKA, FRANZ, MARENTEIN,  
TOLLOKU, RAYMOND,  
FAC. FDC, PUYUTTAHAT, HAGAHASIS.

FIG. 1-01-02



**ASO SA:**

**1 TESEMA 2024**

**MATAUPU**

**O LE FOA'I SILI A LE ATUA**

**SINI:**

Ia malamalama le vasega, o Iesu o le foai sili a le Atua mo le lalolagi

**TUSI FAITAU:**

ISAIA 9: 6 – 7 (MO LE FAIAOGA)

ISAIA 9: 6 (MO LE VASEGA)

“Aua ua fanau mai mo i tatou le tama, ua foaiina mai mo i tatou le atalii, e i lona ua le malo, igoa foi o ia o le Silisili ese, o le faipule, o le Atua malosi, o le Tama o le faavavau, o le Alii o le filemu”

**FESOASOANI MO FAIAOGA:**

Tamaiti, ua tatou i ai foi i le masina mulimuli o lenei tausaga. O le mataupu o lenei Aso Sa, e faasino i le meaalofa sili a le Atua mo le lalolagi. E tele meaalofa a le Atua na faia mo le lalolagi. O mea uma na ia faia, e i ai laau ma manu ese'ese, o vaitafe ma le sami, ma i'a o i ai. E faapena foi i o tatou matua. O meaai ma vai e inu, ma le tele o isi mea lelei. O mea uma lava ia na foai mai e le Atua mo i tatou. Ae o le meaalofa silisili lava na aumai e le Atua, o lona lava Atalii e toatasi o Iesu.

O le meaalofa lenei a le Atua, ua leva ona folafola mai i aso anamua. N a ta'u mai e auaua a le Atua e ta'ua o perofeta. E i ai le perofeta e igoa ia Isaia, fai mai, e i ai le aso e fanau mai ai le tama, e foai mai ai le atalii, o ia lena e ta'u o le Faipule, o le Atua malosi, o le Tamā o le faavavau, ma le Alii o le filemu.

Tamaiti, o le foai po o le meaalofa sili lea a le Atua mo oe ma au ma le lalolagi atoa. O Iesu Lona Alo e toatasi. ua afio mai e faaola i tatou.

**GALUEGA FAATINO: PASO (PUZZLE)**

Faamolemole faiaoga e tusi le paso i se pepa. Fa'aaoga le fanau e su'e upu ua tuuina atu

ATUA MALOSI  
FILEMU

FAIPULE  
VALOAGA

ISAIA  
MESIA

FAAVAVAU  
ISARAELO

A	I	S	A	R	A	E	L	U	R
E	T	G	I	O	F	L	M	N	O
V	S	U	F	T	A	U	E	O	P
A	P	S	A	F	A	U	M	A	U
L	R	V	I	M	V	M	U	V	A
O	A	E	P	E	A	E	I	A	V
A	O	P	U	S	V	L	E	I	T
G	F	A	L	I	A	I	O	A	S
A	E	U	E	A	U	F	I	S	M
V	M	N	S	P	T	M	R	I	I

**PESE:** Pese Kerisimasi

Ia usu ni pese o le Kerisimasi ua masani ai le vasega

**A'OA'OGA:** 1. O Iesu le meaalofa sili a le Atua  
2. Ia fafia e fai meaalofa mo isi

**ASO SA:**           **8 TESEMA 2024**

**MATAUPU:**       **UA FA'AALI LE AGELU IA MARIA**

**SINI:**              Ia malamalama le vasega, o le agelu a le Alii na faailoa ia Maria, o le a ia fanaua se tama tane

**TUSI FAITAU:**     LUKE 1: 26 – 31 (MO LE FAIAOGA)  
LUKE 1: 26 – 27 (MO LE VASEGA)

“O le ono o masina ua auina mai ai e le Atua o le agelu o Kaperielu i le aai o Kalilaia, o Nasareta le igoa, i le taupou o le aiga o Tavita, ua faufautane i le tagata e igoa ia Iosefa; o Maria foi le igoa o le taupou”

**FESOASOANI MO LE FAIAOGA:**

Sa i ai se taupou o le aiga o Tavita e igoa ia Maria, e nofo i le aai o Nasareta i Kalilaia. Na faufatane o ia i le tagata e igoa ia Iosefa.

O Kaperielu, o le agelu a le Atua na Ia auina ane ia Maria, ma faailoa ia te ia le mea na finagalo i ai le Atua. Ua fai ane le agelu ia Maria, “Maria e, ‘aua e te fefe; aua ua alofaina mai oe e le Atua. Faauta foi, o le a to oe, ma fanauina se tama tane, e te faaigoa ia te ia o Iesu”

Tamaiti, o le feau lena na fai ane e le agelu ia Maria. O le tama o le a fanau mai ia te ia, o Iesu lea ua fai ma faaola ia i tatou ma le lalolagi atoa.

**GALUEGA FAATINO:**   Faatino le tala

Faamolemole tou susuga i faiaoga ina ia faatinoina le tala i luma o tamaiti.

**PESE:**              My Jesus my Saviour (youtube)

My Jesus, my Saviour  
Lord there is nothing like You  
All of my days, I want to praise  
The wonders of Your Mighty love  
My comfort my shelter  
Tower and refuge and strength  
Let every breath, all that I am  
Never cease to worship You

**A'OA'OGA:**          1.        O Maria le tina o Iesu.  
                          2.        O Maria le taupou.

## UA FA'AALI LE AGELU IA MARIA



## MARIA MA LE AGELU



**ASO SA:**           **15 TESEMA 2024**

**MATAUPU**           **UA FANAU IESU I PETELEEMA**

**SINI**               Ia malamalama le vasega o Peteleema le aai na fanau ai Iesu

**TUSI FAITAU**       LUKA 2: 1 – 20 (MO LE FAIAOGA)  
                          LUKA 2: 15      (MO LE VASEGA)

“Ina tatou o ia i Peteleema, tatou te vaavaai i lenei mea ua faia, ua faailoa mai ia tei tatou e le Alii”

**FESOASOANI MO FAIAOGA:**

Tamaiti, o ai foi o manatua, o le a le mea e tupu i le masina lenei? Lelei tele. O le Kerisimasi, e faamanatuina ai e le lalolagi atoa le fanau mai o Iesu Keriso.

E fia soso’o mai le tatou mataupu mai i le Aso Sa na tea nei. Ua oo i le tasi aso, ona poloai lea e le tupu, ina ia faia se tusiga igoa, e tusia uma ai igoa o tagata ma o latou ‘auaiga. Ona o ai lea o Maria ma Iosefa, ina ia tusia o la igoa i le aiga o Tavita i Peteleema.

A o i ai Iosefa ma Maria i Peteleema, na fanau ai le pepe o Iesu i le fale o manu. Na lagona le fiafia o Maria ma Iosefa, ina ua fanau mai Iesu

Tamaiti, o Peteleema, o le tasi o aai o Iutaia.

**GALUEGA FAATINO:**       Faatino le tala

Faamolemole susuga i faiaoga ina ia faatinoina ma le fanau le tatou tala. Manaia foi ae tapena e lau susuga ni meaalofa mo le fanau pei o ni paluni, lole ma nisi lava mea e te silafia e aoga mo le fanau.

**PESE:**               Pese Kersimasi

Ia usu ni pese ua masani ai le fanau.

**A’OA’OGA:**       1.     Sa fanau Iesu I le fale o manu  
                          2.     O Iesu le pepe o le Kerisimasi

## UA FANAU IESU I IERUSALEMA





**\*\*\*\*\*MANUIA TELE LE KERISIMASI MA LE TAUSAGA FOU\*\*\*\*\***